

SURANA PAULUS MOBHAA-BHAANA TO JAMA'A I KORINTUS

POGAU BHAA-BHAANA

Surana Paul Mobhaa-bhaana to Jama'a i Korintus aburia to apogauaka manga masa'ala modhaangiana i tanga-tangana jama'a mopadhana ipakarona Paul i kota Korintus sumai. Manga masa'ala incia sumai satotuuna o pokaiana tee masa'alana dhadhi tee kaparacaeana Karasiteni. Korintus sii wakutuu incia sumai saangu kota i Yunani, ibu kotana poropinsi Akhaya mopesuana i nuncana pamarintana Roma. Kota incia sii o ra'eatina aminaaka i sagala giuna lipu, tee abhari momataua roonamo amaju i nuncana podhagaa, adatina tee akalana budina amalanga. Maka dhaangia uka inda momalapena akalana budina tee uka rampaakanamo kabharina kaadharina agama iwe sumai.

Mobhaa-bhaana mpuu ifikirina Paul satotuuna o masa'alana potagatagali tee pewau madhaki i tanga-tangana jama'a, masa'alana pebula tee kawia, antona ngangaranda, sara i tanga-tangana jama'a, rahumatina Rohina Aulata'ala, tee masa'alana dhadhiana pendua mia mate. Maka tee fahamuna momandala o Paul asusuakea tuaapa o Lele Malape minaaka i Aulata'ala to alawaniaka manga masa'ala incia sumai.

Pasala 13 agambaraaka tuaapa o bhanguna kaasi molagina. Pasala incia sii aipomo pasala imatauna mpuu mia bhari minaaka i bhari-bharia pasala mosagaanana i nuncana boku incia sii.

Paul aburi sura incia sii to jama'a i Korintus minaka i kota Efesus, kera-kera i tao 55 sapadhana Al Masi alaahiri.

Antona

Porikanaana pogau 1:1-9

Potagalia i nuncana gareja 1:10--4:21

Masa'alana poromuana umane tee bhawine
tee masa'alana i nuncana bhanua 5:1--7:40

Miana Karasiteni tee mia inda mosombana
Aulata'ala 8:1--11:1

Dhadhina jama'a tee ibaadati 11:2--14:40

Masa'alana dhadhiana pendua Al Masi tee mi-
ana Karasiteni minaaka i mate 15:1-58

Kahamba to manga miana Karasiteni i Yudea
16:1-4

Masa'alana pokaiana tee haejatina Paul to
aumbati jama'a i Kolose, manga salamu, tee
kapadhaa 16:5-24

Salamu

1:1-3

¹ Sura incia sii minaaka iaku o Paul, motokembana roonamo kapeeluana Aulata'ala to amembali rasuluna Isa Al Masi, tee minaaka i Sostenis o witinaita.

² To jama'ana Aulata'ala i Kota Korintus, motopekangkiloni i nuncana sarona Isa Al Masi, tee

motokembana to amembali manga mia mosaal-
ihi mopobhawa-bhawana tee bhari-bharia mia
i bhari-bharia tanpa mosombana i Isa Al Masi
Oputa Momalanga, siitumo Opuna manga incia
tee Oputa uka.

³ Rahumati tee dhadhi momalape minaaka i
Aulata'ala, Amata, tee minaaka i Isa Al Masi
Oputa Momalanga apoose tee ingkomiu.

*Kabarakati minaaka i Aulata'ala Alaloi Isa Al
Masi*

1:4-9

⁴ Iaku sadia kusukuru i Aulata'ala isombaku to
rahumati mopadhana idhawuakana to ingkomiu
alaloi saroni Isa Al Masi.

⁵ Roonamo i nuncana saroni Al Masi,
Aulata'ala adhawuakakomiu ataralabhi-labhi
sagala giuna hali, siitumo sagala giuna hali
umakidhaaka uadhari, tee sagala giuna katau,

⁶ apokana tee kasakusii pokaiana tee Al Masi,
mopadhana ipakaawakamami mokobukutiina
mohanara i nuncana karomiu.

⁷ Tee mboo sumai, ingkomiu inda ukakuran-
gaaka uka saangu rahumati wakutuuna uantagi
umbaana Isa Al Masi Oputa Momalanga.

⁸ Incia uka bheatulungikomiu mamudhaakana
utorotorosu uparacaea sakawana aahirina za-
mani, sabutuna wakutuuna Isa Al Masi Oputa
Momalanga ambuli i eo incia sumai, ingkomiu
inda tee kasalahamiu.

⁹ Aulata'ala amembali atoparacaea mpuu; In-
cia mokembakomiu tee mopaposaangukomiu tee
Anana, siitumo Isa Al Masi Oputa Momalanga.

*Potagalia i nuncana Jama'a**1:10-17*

¹⁰ E manga witinaiku! I nuncana saronā Isa Al Masi Oputa Momalanga, iaku kuemanikomiu mamudhaakana bhari-bharikomiu uposaangu, tee bholi upotagatagali podho-podho ingkomiu, maka ingkomiu u'usaha to uposaangu mamudhaakana atotuu-totuu usainca tee safikiri.

¹¹ E manga witinaiku, manga mia mominaakana i witinaita bhawine, siitumo Kloe, padhamo apaumbaakaaku pokaiana tee ingkomiu, ande dhaangia tee pogera-gera i tanga-tangamiu roonamo uose manga mia moposala.

¹² Ma'anana ipogauakaku sii mboo sii, i tanga-tangamiu dhaangia tee mopogauna, "Iaku kuose Paul," "Iaku kuose Apolos," "Iaku kuose Kefas,"* atawa "Iaku kuose Al Masi."

¹³ Buaka o Al Masi sumai atobage-bage? Buaka o Paul atoloe i kau salib to apasalaamatikomiu? Atawa buaka ingkomiu utopapebhaho i nuncana saronā Paul?

¹⁴ Iaku kusukuru i Aulata'ala roonamo inda dhaangia samia uka minaaka i ingkomiu ipapebhahoku, maka tangkanamo Krispus tee Gayus,

¹⁵ ancōsala dhaangia o mia mopogauna ande ingkomiu kupapebhahokomiu i nuncana saroku.

¹⁶ (Iaku kupapebhaho Stefanus tee witinaina. Tee iudhaniku sapadhana incia sumai indamo

1:12 1:12 Tul. 18:24. * **1:12 1:12** Kefas: I nuncana pogau Aram, Kefas akoma'ana "bhatu," apokana tee "Petrus" i nuncana pogau Yunani. Pogau Aram sii sala saangu pogau ipakena ra'eatina Israel i zamanina Isa tee manga murina. **1:14 1:14** Tul. 18:8; 19:29; Rom. 16:23. **1:16 1:16** 1Kor. 16:15.

dhaangia uka ipapebhahoku).

¹⁷ Al Masi alambokoaku mencuana to kupapebhaho manga mia motoba, maka to kupakawaaka Lele Malape. Tee Incia amendeusakaaku kupakoleleakea Lele Malape sumai mboomo mia momakidhana mopotagali, mamudhaakana o matena Isa Al Masi i kau salib sumai inda asia-sia.

Hikimatina Aulata'ala tee Hikimatina Maanusia

1:18-25

¹⁸ Roonamo lele mopokaina tee matena Isa Al Masi i kau salib atoabhi saangu giu mokabhongobhongo to manga mia moosena dhala mobinasa, maka to ingkita moosena dhalana kasalaamati, lele incia sumai taabhia amembali carana Aulata'ala to asusuaka kuasana to ingkita.

¹⁹ Roonamo i nuncana Kitabi Momangkilo padhamo atoburi,

"Iaku bhekupabinasa hikimatina manga mia mokohikimati,
tee bhekupahancuru katauna manga mia moko'ilimuu."

²⁰ Ande mboo sumai, opea o gunana manga mia mokohikimati? Opea o gunana manga ahali Hukumuna Taurati? Opea o gunana manga mia momakidha molawanina pogau i dunia sii? Aulata'ala padhamo asusuakea ande bhari-bharia hikimati i dunia sii amembali giu mosiasia.

²¹ Roonamo Aulata'ala atantuakea ande o maanusia i dunia sii inda bheamatau Aulata'ala

alaloi kakidhana karona, sumaimo Aulata'ala atantuaakea to apasalaamati manga mia moparacaeia alaloi lele ipakawaakamami motoabhina giu mokabhongo-bhongo sumai.

²² Inciamo manga miana Yahudi aemani tanda-tanda inda momentela tee manga miana Yunani atuntu hikimati,

²³ maka ingkami tangkanamo tapakoleleaka Al Masi motoloena i kau salib. Hali incia sumai amembali giu itosunuakana incana manga miana Yahudi, tee atoabhi o giu mokabhongo-bhongo to manga mia inda motolentuna miana Yahudi.

²⁴ Maka to manga mia ipilina Aulata'ala, malape miana Yahudi atawa o miana Yunani, *(siitumo o mia inda motolentuna miana Yahudi)*, Al Masi sumai amembali carana Aulata'ala to asusuaka kuasana tee hikimatina.

²⁵ Roonamo opea iabhi giu mokabhongo-bhongo maka moumbana minaaka i Aulata'ala, alabhi akohikimati minaaka i hikimatina maanusia, tee opea iabhi saangu kakuranga moumbana minaaka i Aulata'ala, giu incia sumai satotuuna alabhi o kakaana minaaka i kakaana maanusia.

²⁶ E manga witinai! Coba udhania tuaapa o kadhaangiamiu wakutuuna Aulata'ala akembakomiu to umembali mia moparacaeana tee Isa; minaaka i kabharimiu sii saidhemea o mia mo'aarifu, mia mokokuasa, atawa o mia momalangana kauncuramakana i dunia sii.

²⁷ Roonamo Aulata'ala aporadhamiia to apili motoabhina mokabhongo-bhongona i dunia sii, mamudhaakana manga mia momakidha amaea. Tee o Aulata'ala uka apili motoabhina momalute i

dunia sii, mamudhaakana manga mia momakaa amaea.

²⁸ Manga giu motohina tee inda motoabhina opeapo uka i dunia sii, Aulata'ala apilia mamudhaakana apanainda manga giu mokoma'ana i dunia sii,

²⁹ mamudhaakana inda dhaangia o mia momembalina mosomboakana karona i aroana Aulata'ala.

³⁰ Rampaakanamo Aulata'ala, ingkomiu uposaangu i nuncana sarona Isa Al Masi. Alaloi Al Masi ingkita mangapamembali ta'arifu, tee alaloi Al Masi uka o Aulata'ala mangapamembali tapomalape pendua tee karona, ingkita mangapamembali uumatina momangkilo, tee mangatolosi.

³¹ Sumaimo rampaakanamo bhari-bharia mopadhana ipewauna Aulata'ala to ingkita, siitumo ingkita tabeana tama'anaia motoburina i nuncana Kitabi, "Incema-incema mobanggaakana karona, incia tabeana abanggaaka uka opea ipewauna Kawasana Opu."

2

¹ E manga witinaiku, mboomo uka i waku-tuuna kuumbatikomiu, iaku kuumba mencuana to kususuka kakidhaku kupogau atawa kubhoasaka pogau mokohikimati to kupakoleleaka rahasia* minaaka i Aulata'ala to ingkomiu.

² Roonamo padhamo kuala kambotu kangengena iaku kupobhawa tee ingkomiu,

^{1:31 1:31} Yer. 9:24. * ^{2:1 2:1} rahasia minaaka i Aulata'ala: Ma'anana, haejatina Aulata'ala indapo imatauna dunia.

iaku inda bhekupogauaka opeopea, maka iaku tangkanamo kupogauaka pokaiana tee Isa Al Masi, siitumo Incia motoloena i kau salib sumai.

³ Tee wakutuuna kumboore tee ingkomiu, kumalute mpuu tee kurengku torosu roonamo kumaeka mpuu.

⁴ Rampaakanamo sumai, lele ibhawaku to ingkomiu inda kupakawaakea tee bhoasaka moko-hikimati to kuwujukomiu, maka o bukutiina kaadhariku satotuuna o kuasa mopadhana idhawuakana Rohi Momangkilo,

⁵ mamudhaakana o iimanimiu inda atangkaaka hikimatina maanusia, maka utangkaaka kuasana Aulata'ala.

Hikimati Mobanara

2:6-16

⁶ Moomini mboo sumai, to manga mia momatangkana iimanina, atotuu ingkami tapakawaakea i manga incia tee hikimati, maka mencuana tee hikimati mominaakana i dunia sii atawa tee hikimati mominaakana i manga mia mokenina kuasa i dunia bhemomofuna sii.

⁷ Hikimati ipakawaakaku sumai o hikimati mominaakana i Aulata'ala, siitumo rahasia motobuniaka, mopadhana ipatotapuakana Aulata'ala i wakutuuna indapo dhaangia o dunia sii to aumbaaka kamuliangi to ingkita.

⁸ Inda dhaangia samia uka minaaka i manga mia mokenina kuasa modhaangiana i zamani sii-sii momatauna hikimati incia sumai. Roonamo ande amataua, atantumo manga incia inda

bhealoe Oputa Momalanga tee Momuliana sumai i kau salib.

⁹ Maka mboomo mopadhana motoburi i nuncana Kitabi Momangkilo,

"Opea indapo ikamatana mata,

atawa indapo irangona talinga,

tee indapo atonamisi i nuncana ngangarandana maanusia

siitumo ipasadiaakana Aulata'ala to manga mia momaasiakea."

¹⁰ Aulata'ala padhamo mangapaumbaaka hiki-matina sumai alaloi Rohina, roonamo Rohi sumai aparakisaa opeapo uka, sampe amembali uka amatau rahasiana Aulata'ala motobuniaka.

¹¹ Incema momembalina momatauna manga giu modhaangiana i nuncana ngangarandana mia, ande mencuana rohina karona o mia incia sumai? Mboomo uka tee Aulata'ala, inda dhaangia momatauna manga giu modhaangiana i nuncana ngangarandana maka tangkanamo Rohina karona o Aulata'ala.

¹² Tee ingkita inda mangadhawuaka rohina dunia, maka mangadhawuaka Rohi mominaakana i Aulata'ala, mamudhaakana tamataua bhari-bharia mopadhana irahumatiakana Aulata'ala to ingkita.

¹³ Rampaakanamo sumai, ande ingkami tapakawaaka manga giu mopokaina tee Aulata'ala to manga mia mokorohiakana Aulata'ala, ingkami inda tapakawaakea tee hikimatina maanusia, maka tapakawaakea tee opea iadhariakana Rohina Aulata'ala.

¹⁴ Mia indapo motarimana Rohina Aulata'ala inda amembali atarima manga giu mominaakana i Rohina Aulata'ala, roonamo manga incia aabhi manga giu incia sumai mboomo saangu giu mokabhongo-bhongo tee inda amembali ama'anaia, roonamo manga giu incia sumai tangkanamo mia motorahumatiakana Rohina Aulata'ala momembalina moma'anaia.

¹⁵ Mia moposaanguna tee Rohina Aulata'ala amembali ama'anai bhari-bharia giu, maka incia inda amembali ahaakimua mia indapo mopotibhaakana hikimati minaaka i Rohina Aulata'ala.

¹⁶ I nuncana Kitabi Momangkilo atoburi,
"Incema momatauna fikirina Kawasana Opu?
Tee incema momembalina monaasehatia?"
Maka ingkitamo mokofikirina mopokana tee Al Masi.

3

Potagalia

3:1-9

¹ E manga witinaiku, satotuuna iaku inda kumembali kupogau tee ingkomiu mboomo kupogau tee mia modhadhina moosena Rohina Aulata'ala. Maka iaku tabeana kupogau tee ingkomiu mboomo kupogau tee mia modhadhina moosena nawusuuna dunia, atawa mboomo kupogau tee mia inda moko'ilimuu tee inda moko'hikimati tee o katauna pokaiana tee Al Masi mboomo anaana maidhiidhi.

² Kaadhari ipakawaakaku piamo itu mboomo ibaratina uwenā susu, mencuana kudhawuakako kinande momatu'a, roonamo giu incia sumai indapo ukapoia to utarimaia. Tee sakawana sii-sii uka ingkomiu indapo amembali ukande kinande incia sumai.

³ Rampaakanamo sumai ingkomiu dhaangiapo udhadhi uose nawusuuna dunia. Sakawana sii-sii ingkomiu dhaangiapo upogigibulu tee upogera-gera podho-podho ingkomiu, siitumo mobukutiiakana ande ingkomiu udhadhi uose nawusuuna dunia, apokana mboomo mia mokodosa mosagaanana.

⁴ Bukutiina dhaangia mopogauna, "Iaku kuose Paul," tee mosagaanana uka apogau, "Iaku kuose Apolos." Pewaumiu mboo sii apatokamataaka ande ingkomiu dhaangiapo udhadhi uose nawusuuna dunia.

⁵ Satotuuna incema o Apolos tee incema o Paul sumai? Ingkami tangkanamo mia molaianina Aulata'ala, mopadhana moadhariakakomiu to uparacaeaaka tee Isa Al Masi. Ingkami taruamia soo taose opea ipatugasiakana Kawasana Opu.

⁶ Iaku mopombulaia tee o Apolos mobubusia, maka o Aulata'ala mopatuwua.

⁷ Rampaakanamo sumai, malape mopombulaia atawa mobubusia mencuana giu moto-faraluuna mpuu, maka tangkanamo Aulata'ala mopatuwua ifaraluuta.

⁸ Mia mopombula tee mia mobubusia sumai saangumea o tujuana, tee sumbesumbere

bheatarima ponambona apokana tee opea ikarajaana.

⁹ Roonamo ingkami sii o sabhangka sakarajaa to Aulata'ala, sainamo ingkomiu o inawuna Aulata'ala, tee o bhanua ipakarona Aulata'ala.

Fondasi tee Bhanua
3:10-23

¹⁰ Mboomo rahumatina Aulata'ala idhawuakana to iaku, iaku sii ibaratina mboomo samia pandena bhanua mo'arifu mopadhana modhikana fondasina bhanua, tee o mia mosagaanana mopakarona bhanua i bhawona fondasi sumai. Maka manga mia tabeana sumbesumbere akamatea pekalape tuaapa manga incia apakaro bhanua i bhawona fondasi sumai,

¹¹ roonamo inda samia uka momembalina modhikana fondasi mosagaanana iwe sumai ande mencuana fondasi mopadhana idhikaku, siitumo Isa Al Masi.

¹² I bhawona fondasi sumai manga mia amembali apakaro tee apake manga parewana bhanua minaaka i bulawa, pera, bhatu tundu, kau, rumpu, tee laena gandum.

¹³ Roonamo akawaaka wakutuuna Isa Al Masi aumba naile itu, opea ikarajaana manga mia bheapatokamataakea o katangkana tee waa samia-samia to aujiaka bhari-bharia opea mopadhana ikarajaana manga incia.

¹⁴ Ande o karajaana manga incia i bhawona fondasi sumai inda akandea waa, sumaimo manga incia bheatarima ponambona.

¹⁵ Maka ande o karajaana manga incia i bhawona fondasi sumai akandea waa, siitumo manga incia amarugi. Tee moomini mboo sumai incia bheatopasalaamati, maka o kadhaangiana mboomo mia molapana minaaka i kangau.

¹⁶ Inda umataua buaka ande ingkomiu itu o Bhanuana Aulata'ala tee Rohina Aulata'ala amboore i nuncana karomiu?

¹⁷ Ande dhaangia o mia modhaki-dhakina Bhanuana Aulata'ala, sumaimo incia uka bheadhaki-dhakia Aulata'ala, roonamo Bhanuana Aulata'ala sumai amangkilo tee ingkomiumo Bhanuana Aulata'ala sumai.

¹⁸ Bholi utipu karomu samia. Incemapo uka moabhina karona o mia momakidhana i nuncana ilimuuna dunia, maka salabhina ubholimea o ilimuumu sumai! Taroakamo utoabhiaka ukabhongo-bhongo i matana maanusia, maka somanamo utoabhi u'aarifu i matana Aulata'ala.

¹⁹ Roonamo ka'aarifu i dunia sii amembali saangu giu mokabhongo-bhongo i matana Aulata'ala. Roonamo padhamo atoburi, "Aulata'ala apake kakidhana manga mia mo'aarifu to apamembalia katapu to arakoaka manga incia."

²⁰ Tee dhaangia uka motoburina mboo sii, "Kawasana Opu amataua o fikirina manga mia mo'aarifu; tee satotuuna bhari-bharia sumai tangkanamo giu mosia-sia."

²¹ Rampaakanamo sumai bholi dhaangia mi-naaka i ingkomiu mobanggaakana maanusia

rangamiu, roonamo bhari-bharia sumai o pewauamiu:

²² malape o Paul, Apolos, Kefas,* dunia sii, dhadhi, mate, atawa manga giu modhaangiana i zamani sii-sii tee manga giu bhemoumbana naile itu, bhari-bharia sumai o pewauamiu.

²³ Sainamo ingkomiu o pewauana Isa Al Masi, tee o Isa Al Masi o pewauana Aulata'ala.

4

Aulata'ala Sakaro-karona o Haakimu

4:1-5

¹ Tee mboo sumai, ingkomiu mangaabhimo mboomo bhatuana Al Masi mopadhana iparacaeaakana Aulata'ala to mopakawaakana haejati irahasiaakana to maanusia.

² Roonamo manga mia mopadhana iparacaeaakana tee tugasi incia sumai tabeana atotuu-totuu amembali atoparacaea.

³ Maka to karoku inda amembali masa'ala, malape minaaka i ingkomiu mohaakimuaku atawa minaaka i pangadilana maanusia, tee sampe o karoku uka inda amembali kuhakimua.

⁴ Imatauku, inda tee kasalahaku. Maka mencuana tee kadhaangia mboo sumai imembaliakaku kutopabanara. Ande kusala atawa kubanara dhaampomo Kawasana Opu mohaakimuaku.

⁵ Rampaakanamo sumai, ande indapo akawa o wakutuuna, siitumo umbaana Kawasana Opu, bholi uporikana upasala tee uhaakimu mia. Incia bheasuluwi bhari-bharia giu motobuniakana

* **3:22 3:22** *Kefas*: Kefas sii atosarongi uka Petrus.

i nuncana kalalanda, tee bheapatokamataaka bhari-bharia haejati modhaangiana i nuncana ngangarandana maanusia. Wakutuumo incia sumai malingu molaengana samia-samia bheapotibhaaka kapujia minaaka i Aulata'ala.

Paporitambea o Karomiu

4:6-21

⁶ E manga witinaiku, bhari-bharia ipogauakaku sii kupatujuakea to karoku tee Apolos, mamudhaakana bhari-bharikomiu ukamata pemingkuimami tee amembali upengkaadhariaaka ma'anana pogau incia sii, "Ta'atimo tee opea mopadhana motoburina i nuncana Kitabi Momangkilo." Tee mboo sumai ingkomiu inda amembali usomboaka karomiu tee ubanggaaka incemapo uka alabhi minaaka i mia mosagaanana.

⁷ Incema mopamembalikomiu ulabhi minaaka i mia mosagaanana? Tee bhari-bharia modhaangiana i karomiu aminaaka i iapai ande inda aminaaka i kadhawu? Roonamo bhari-bharia minaaka i kadhawu, apokia ubanggaaka karomiu kabilanga opea modhaangiana i karomiu sumai inda upotibhaakea minaaka i kadhawu?

⁸ Maka ingkomiu uabhi karomiu indamo tee ifaralumiu tee urangkaeamo! Ingkomiu uabhimo karomiu mboomo raja tee indamo uka mangafaraluu. Umbe! Amangadamo mpuu ande ingkomiu umembalimo raja! Tee mboo sumai, ingkami molaianikomiu sii tamembali tatoabhi kaogesa!

⁹ Roonamo ifikiriku, Aulata'ala padhamo mangadhika i tanpa moporitambe mpuu to ingkami manga rasuluna sii. Ingkami tamembalimo mboomo manga mia motangasaana motohukumu mate i aroana mia bhari tee mangapokamakamataakamo saangua dunia, malape maanusia atawa o malaa'ekati.

¹⁰ Rampaakanamo ingkami taparacaea tee Al Masi, manga mia mangaabhimo mia mokabhongo-bhongo, maka ingkomiu *uabhi karomiu* umakidha i nuncana sarona Al Masi. Ingkami inda tee kakaamami, maka ingkomiu *uabhi karomiu* umakaa. Ingkami tatohina, maka ingkomiu *uabhi karomiu* mia motomuliangi!

¹¹ Sakawana sii-sii ingkami dhaangiapo tanamisi kaara tee katuuna bhoroko, pakea ipakemami amalusa tee amabhenci-bhencimo, manga mia amenturu mangatapa, tee o mbooresamami inda atomatau i iapai.

¹² Ingkami tasawubukumami to takarajaa tee limamami. Tee amenturu mangahina mia, maka ingkami tabalasia tee kabarakati, ande dhaangia o mia mangasikisaana, ingkami tasabara.

¹³ Ande ingkami mangafitanaa, ingkami tabalasia tee pogau malape. Sakawana sii-sii ingkami tatopewau mboomo karombu i nuncana dunia sii, tee tatoabhi karombu i bhawona alamu sii.

¹⁴ Giu incia sii kuburia mencuana to kupekaeakomiu, maka to kuudhaniakakomiu mboomo anaku imaasiakaku.

¹⁵ Roonamo moomini rewuna mia o gurumiu i nuncana sarona Al Masi, maka iaku kumembali

amamiu alaloi Lele Malapena Isa Al Masi mopadhana ipakawaakaku to ingkomi.

¹⁶ Siitumo sababuna iaku kuemani mpuu mamudhaakana ingkomi "Upamembaliaku conto."

¹⁷ Siitumo sababuna, mbakana kulambokoakakomi Timotius o anaku imaasiakaku tee iparacaeaku i nuncana saron Kawasana Opu. Incia bhemoudhaniakakomi tuaapa o carana dhadhiku i nuncana saron Isa Al Masi, mboomo iadhariakaku to manga jama'a i bhari-bharia tampa.

¹⁸ Inciamo dhaangia o mia mosomboakana karon i tanga-tangami, roonamo aabhiaku indamo bhekuumbatikomi.

¹⁹ Maka maasangia o Kawasana Opu aundaakaaku to kumbatikomi pekadhei. Tee mboo sumai iaku bhekumataua mencuana tangkanamo opea bheipogauakana manga mia mosomboakana karon sumai, maka bhekumataua tuaapa o kuasana manga incia.

²⁰ Roonamo Pamarintana Aulata'ala mencuana tangkanamo soo minaaka i pogau, maka aminaka i kuasa.

²¹ Jadi soo upilimo opea ipeelumiu! Iaku kumba kubhebheakakomi lauro atawa kumba tee kaasi tee ngangaranda momalulu?

5

Dosa i Nuncana Jama'a *5:1-13*

¹ Iaku satotuuna padhamo kurango lele ande i tanga-tangamiu dhaangia tee mopewauna pebula, tee o pewau incia sumai indapo padha tarangoa apewaua manga mia mokaafiri uka. Dhaangia i tanga-tangamiu o umane mopewauna zinaa tee ina awona.

² Buaka dhaangiapo uka bheusomboaka karomiu? Ingkomiu tabeana usukara, tee upekaridhoa o karomiu minaaka i umane mopewauna giu incia sumai.

³ Inciamo badaku apomaridho tee ingkomiu, maka o rohiku apoose tee ingkomiu, tee padhamo kudhawuakea kahukumu to mia mopewauna giu incia sumai mboomo kudhaangia i tanga-tangamiu.

⁴ Jadi wakutuuna uporomusaka i nuncana sarona Isa Al Masi Oputa Momalanga, udhania ande iaku kupoose tee ingkomiu i nuncana rohi tee kuasa minaaka i Isa Oputa Momalanga,

⁵ pasarakaakamea o mia incia sumai i Ibilisi, mamudhaakana abinasa o badana, tee mboo sumai o rohina bheatopasalaamati wakutuuna eona umbaana Isa Al Masi Oputa Momalanga.

⁶ Opea isomboakamiu sumai inda alaenga. Buaka ingkomiu inda umataua o pogau ibarati incia sii? "Saidhe ragi amembali apajulu saangua kajalona tarigu!"

⁷ Bhanakea o ragi momangenge sumai,* si-itumo ragina dosa, mamudhaakana ingkomiu umembali kajalona tarigu mobhaau. Inciamo kumataua ande o kadhaangiamiu mboo sumai, roonamo Isa Al Masi momembalina dumbana Paskata sumai padhamo atokurubaniaka.

⁸ Rampakaanamo sumai, maimo tararaeaakea mencuana tee ragi momangenge, tee uka mencuana tee ragi inda momalape atawa o giu momadhaki, maka tararaeaakea tee roti inda mokoragi, siitumo tee kakatena ngangaranda tee kabanara.

⁹ I nuncana sura ilambokoku to ingkomiu padhamo kuburiakakomiu, "Bholi uposabhangka tee manga mia mopewauna pebula."

¹⁰ Ma'anana kaburiku sii mencuana to upekaridho karomiu tee bhari-bharia mia mope-wauna pebula, atawa tee manga mia momaso'o, pande pekatipu, tee manga mia mosombana barahala inda momatauna Aulata'ala sampeamparo, roonamo ande upewau mboo sumai, ingkomiu tabeana ulimba minaaka i dunia sii.

¹¹ Maka o ma'anana opea mopadhana iburiku sumai, satotuuna mamudhaakana ingkomiu

5:7 5:7 Limb. 12:5. * **5:7 5:7** *Bhanakea o ragi momangenge sumai*: Aulata'ala atumpu Nabii Musa to apakawaaka tuturana Paska i manga miana Israel mboo sii: miana Israel tabeana abhanakea bhari-bharia ragi modhaangiana i bhanuana tee inda amembali apakea o ragi incia sumai kangengena pitu eo sapadhana rareana Paska. Kamata Kab. 28:17. Jadi o Paul apogau ande o mia moparacaeana tee Isa tabeana abhanakea o "ragi" modhaangiana i karona, siitumo dosa mominaakana i dhadhina manga incia, roonamo Isa padhamo akurubaniaka Karona to manga incia. **5:8 5:8** Limb. 13:7.

bholi uposabhangka tee manga mia moabhina karon a o mia moparacaeana tee Isa, maka manga incia o pande pebula, mia maso'o, pande sombana barahala, pande fitanaana mia, pande malango, atawa o pande tipu. Rampaakanamo sumai, ingkomiu bholi sampeampearo ukande upobhawa tee manga incia.

¹² Roonamo inda dhaangia o pokaiana tee iaku to kuhaakimu mia modhaangiana i sambalina jama'a. Maka to manga anggotana jama'amiu, buaka mencuana karomiu bhemo'adilia?

¹³ Sainamo manga mia modhaangiana i sambalina jama'a bheahaakimua Aulata'ala. Rampaakanamo sumai, tabeana apokana ipewaumi tee opea mopadhana motoburina mboo sii i nuncana Kitabi Momangkilo, "Padhencumea manga mia madhaki sumai minaaka i tanga-tangamiu".

6

Tapeelo Ka'adili i Manga Mia Inda Moko'iimani 6:1-11

¹ Buaka dhaangia o mia mominaakana i tanga-tangamiu ande apogera tee mia mosagaanana abarani apeelo ka'adili i manga mia inda moparacaeana tee Aulata'ala, mencuana apeelo i manga mia mosaalihi? Apokia incia inda aemani i mia mosaalihi to mo'adilina parakarana sumai?

² Buaka ingkomiu inda umataua ande manga mia mosaalihi bhemohaakimuna dunia sii? Ande o dunia sii bheuhaakimua, buaka ingkomiu inda ukapoia to u'urusu manga parakara momaidhidhi?

³ Buaka ingkomiu inda umataua ande ingkita bhetahaakimu manga malaa'ekati? Ande mboo sumai, ingkita tabeana takapoia tahaakimu manga parakara momaidhiidhi i tanga-tangana jama'a i nuncana dhadhita saesaeo!

⁴ Maka tuaapa, wakutuuna ukoparakaraaka pokaiana tee manga giuna dunia, ingkomiu ubhawe i aroana haakimu inda mosa'agamana tee ingkomiu? Giu incia sumai satotuuna o hali mokabhongo-bhongo!

⁵ Iaku kupogau mboo sumai mamudhaakana ingkomiu unamisi kaea. Buaka minaaka i witinai moparacaeana tee Isa modhaangiana iwe sumai inda dhaangia o mia mo'aarifu momembalina mo'urusuna manga parakara modhaangiana i tanga-tangamiu?

⁶ Maka modhaangiana o parakarana witinaita moparacaeana tee Isa abhawe i mia inda moparacaeana tee Isa to apetutuaka parakarana witinaina moparacaeana tee Isa!

⁷ Tee kadhaangiana parakara i tanga-tangamiu, hali incia sumai amembalimo saangu giu imat-alokamiu. Ingkomiu tabeana uunda umatalo tee mia mosagaanana tee bholimo upotagali. Ma'afuakamea o mia mosala tee taroakamea o karomiu amarugi.

⁸ Garaaka o karomiu mopekatalona tee mopekarugina mia mosagaanana sampe o giu incia sumai ingkomiu upewaua tee witinaimiu karomiu.

⁹ Buaka ingkomiu inda umataua ande manga mia inda mobanara inda bheamembali apesua i nuncana Pamarintana Aulata'ala? Bholi usalad-

hala! Manga mia mopebula, mosombana bara-hala, pande zina, mopopeeluna podho-podho umane,

¹⁰ pande manako, mia maso'o, pande malango, pande fitanaana mia, tee pande pekatipu inda bheamembali apesua i nuncana Pamarintana Aulata'ala.

¹¹ Inciamo i piamo itu dhaangia i tanga-tangamiu mopewauna mboo sumai, maka sii-sii ingkomiu padhamo upasaraakaaka karomiu to utopapebhaho, utopekangkilo, tee utopabanara i nuncana saroni Isa Al Masi Oputa Momalanga tee Rohina Aulata'ala o Kawasana Oputa.

Naasehati to Mia Mopebula

6:12-20

¹² "Bhari-bharia giu ahalala to karoku," maka inda bhari-bharia akofa'eda. "Bhari-bharia giu ahalala to karoku," maka iaku kumendeu apab-hatuaaku opeapo uka.

¹³ Dhaangia uka o mia mopogauna, "Kinande satotuuna to kompo tee o kompo to kinande." Moomini mboo sumai, o Aulata'ala bheapabinasea rua-rua angua. Sumaimo ingkomiu bholi upakea o badamiu to upewau pebula, maka o badamiu upakea to ulaiani Kawasana Opu, roon-amo badamiu itu o pewauana Kawasana Opu.

¹⁴ Aulata'ala tee kuasana padhamo apad-hadhi pendua Isa Oputa Momalanga minaaka i mate, tee ingkita uka bheamangapadhadhi tee kuasana.

¹⁵ Buaka inda umataua o badamiu satotuuna o parewana badana Al Masi? Buaka amembali o

parewana badana Al Masi atoala tee atopamembali parewana badana bhawine pasunda? Atantumo inda!

¹⁶ Buaka ingkomiu indapo umataua, ande o mia moposaanguna tee bhawine pasunda apokanamo asaangu bada tee bhawine pasunda sumai? Roonamo "rua-ruamiaia bheaposaangu," mboomo sumai o firimanina Kawasana Opu.

¹⁷ Maka o mia mopaposaanguna karona tee Kawasana Opu, bheaposaangu tee Incia i nuncana Rohi.

¹⁸ Pekaridhoa o karomiu minaaka i pewau pebula! Roonamo bhari-bharia dosa mosagaanana ipewauna maanusia adhaangia i sambalina badana, maka o mia mopewauna pebula akodosa tee badana karona.

¹⁹ Buaka ingkomiu inda umataua ande o badamiu satotuuna mboomo Kamara Momangkilo tampana mbooresana Rohina Aulata'ala, tee o Rohi momboorena i nuncana karomiu sato-tuuna o Rohina Aulata'ala itarimamiu minaaka i Aulata'ala, Jadi o badamiu mencuanamo pewauamiu?

²⁰ Roonamo ingkomiu atantumo umataua ande o Aulata'ala padhamo atolosikomiu tee haragaa momaali tee padhamo apomeaia. Rampakanamo sumai henganamo badamiu upakea to umuliangiaka Aulata'ala.

7

Kaadharina Kawia 7:1-16

¹ Sii-sii iaku bhekuperangoia o masa'ala iburimiu i nuncana suramiu sumai: Umbe, iaku kusatuju, inciamo amalape ande samia umane inda akawi.

² Maka roonamo abhari o masa'alana pebula, sumaimo salabhina samia umane akobhawine tee samia bhawine akoumane.

³ Malape umane atawa o bhawine tabeana apewau opea iwaajibuka to ipewauna samia umane to bhawinena, mboo sumai uka to samia bhawine i umanena.

⁴ Samia bhawine inda dhaangia o kuasana tee badana karonu, maka tabeana o umanena mokokuasana. Mboomo uka samia umane inda tee kuasana tee badana karonu, maka tabeana o bhawinena mokokuasana.

⁵ Umembali inda uposaangu tee bhawine-miu atawa tee umanemiu, maka podho sabantarama tee uporikana upomufakati mamudhaakana dhaangia o wakutuumiu to udo'a. Sapadhana sumai tabeana uposaangumo pendua ancotala awujukomiu Ibilisi roonamo ingkomiu inda ukapota utaangi nawusuumiu.

⁶ Iaku kupogauaka giu incia sii mencuana to amembali parinta, maka soo kunaasehatikomiu.

⁷ Inciamo o kapeeluku mamudhaakana bhari-bharia mia apokana tee iaku. Maka samia-samia padhamo atarima rahumati minaaka i Aulata'ala to karonu samia-samia. Dhaangia motarimana rahumati mboo sii, dhaangia uka motarimana rahumati mboo sumai.

⁸ Maka to manga mia indapo mokawi tee manga iaiaro modhaangiana i tanga-tangamiu,

siimo inaasehatiakaku: salabhina usadhaadhaa udhadhi samia-miamiu mboomo iaku.

⁹ Maka ande manga incia inda amembali akuasai karona, salabhina manga incia akawi mamudhaakana inda amangau rampaakanamo nawusuuna birahina.

¹⁰ Sainamo to manga incia mopadhana mokawi, mboo siimo kuparintaakakomiu (satotuuna mencuana iaku modhawuna parinta incia sii, maka o Kawasana Opu): Bhawine mokoumane asepali to abholi umanena.

¹¹ Maka ande dhaangia o bhawine mobholina umanena, incia tabeana asadhaadhaa adhadhi inda akoumane, atawa apombulingi tee apomalape pendua tee umanena sumai, mboo sumai uka tee samia umane asepali to abholi bhawinena.

¹² To mia mosagaanana, mboo siimo kunaasehatiakakomiu (satotuuna giu incia sii minaaka i karoku, mencuana minaaka i Kawasana Opu): Ande dhaangia o witinai sa'agama mokobhawineakana samia bhawine inda moparacaeana tee Isa Al Masi, tee o bhawinena sumai asatuju to adhadhi aposaangu tee incia, sumaimo incia asepali abholi bhawinena.

¹³ Mboomo uka tee bhawine mokoumaneakana umane inda moparacaeana tee Isa Al Masi. Ande o umanena sumai asatuju to adhadhi aposaangu tee incia, sumaimo incia inda amembali abholi umanena sumai.

¹⁴ Roonamo umane inda moparacaeana tee Isa Al Masi bheapekangkiloa bhawinena, mboo

sumai uka tee bhawine bheapekangkiloa uma-nena. Ande inda apewau giu incia sumai tantumo manga anaana bheamembali manga anaana moharamu i aroana Aulata'ala. Garaaka manga anaana sumai amangkilo tee sii-sii atoabhimo uumatina Aulata'ala.

¹⁵ Maka ande dhaangia o umane atawa o bhawine indapo moparacaeana tee Isa Al Masi sumai amambotuakea to apobholi tee umanena atawa tee bhawinena moparacaeana tee Isa, sumaimo taroakamea apewaua. I nuncana kadjadia mboo sii manga witinai indamo tee pokia; Aulata'ala akembakomiu mamudhaakana udhadhi upomalape.

¹⁶ E bhawine mokoumane, tuaapa amembali umataua ande ingkoo umembali upasalaamati umanemu *alaloi opea mopadhana isandaraakana karomu*? Mboomo uka umane mokobhawine, tuaapa amembali umataua ande ingkoo umembali upasalaamati bhawinemu *alaloi opea mopadhana isandaraakana karomu*?

Tadhadhi Mboomo Kadhaangiata Wakutuuna Mangakemba Aulata'ala

7:17-40

¹⁷ Bhari-bharia mia tabeana asadhaadhaa adhadhi mboomo kadhaangiana wakutuuna mangakemba Aulata'ala mboomo mopadhana itantukana Kawasana Opu. Siitumo o koto-tapu mopadhana iadhariakaku to bhari-bharia jama'a.

¹⁸ Contona, ande dhaangia o mia mopadhana mototandaki wakutuuna atarima kakembana Aulata'ala, sumaimo mia incia sumai

bholi apailaia manga tandarana tandakiana. Mboomo uka tee mia mopotibhaakana kakembana Aulata'ala i wakutuuna indapo atotandaki, incia bholimo aemani to atotandaki.

¹⁹ Roonamo malape atotandaki atawa indapo atotandaki inda tee ma'anana. Mokoma'anana siitumo tata'ati manga parintana Aulata'ala.

²⁰ Jadi bhari-bharia mia tabeana asadhaadhaa tee kadhaangiana i wakutuuna atarima kakembana Aulata'ala.

²¹ Ande i wakutuuna utokemba o kadhaangiamiu dhaangiapo umembali samia bhatua, bholi umaheruakea o kadhaangiamiu sumai. Maka ande saangu wakutuu dhaangia tee kalale-samiu to umembali samia maradhika, salabhina utarimaia.

²² Roonamo samia ikembana Kawasana Opu i wakutuuna dhaangiapo amembali bhatua, satotuuna samia maradhika i aroana Kawasana Opu. Mboomo uka i wakutuuna samia maradhika motokembana, satotuuna incia o bhatuana Al Masi.

²³ Ingkomiu padhamo utotolosi tee haragaa momaali. Rampaakanamo sumai, ingkomiu bholi umembali bhatuana maanusia.

²⁴ E manga witinaiku, tuaapapo uka o kadhaangiamiu wakutuuna utokemba, kadhaangiamiu tabeana asadhaadhaa udhadhi upobhawa tee Aulata'ala i nuncana kadhaangia mboomo wakutuuna utokemba umembali mia mopobhawana tee Al Masi.

²⁵ Sii-sii kuudhaniakakomiu pokaiana tee manga bhawine indapo mokawina, iaku inda kutarima parinta minaaka i Oputa Momalanga, maka rampaakanamo iaku o

mia mopotibhaakana rahumati sabutuna kumembali mia iparacaeana Aulata'ala, iaku bhekunaasehatikomiu.

²⁶ Roonamo kasukara modhaangiana sii-sii, kufikiria salabhina manga mia asadhaadhaa apotaangiaka kadhaangiana.

²⁷ Ande padhamo ukawi bholi u'usaha to up-obholi tee bhawinemu, tee ande indapo ukawi bholimo u'usaha to upeelo bhawine.

²⁸ Maka ande ukawi, inda ukodosa. Mboomo uka samia kabuabua akawi, sumaimo incia inda bheakodosa. Maka to manga mia mokawi bheabhari mpuu anamisi kanarakaa i nuncana dhadhina, tee gauku ingkomiu ulapa minaaka i bhari-bharia kanarakaa incia sumai.

²⁹ E manga witinaiku, ma'anana pogauku mboo sii, indamo abhari o wakutuuta. Pepuu sii-sii to bhari-bharia mia mokobhawine tabeana adhadhi kabilanga mboomo mia inda mokobhawine,

³⁰ mboo sumai uka tee manga mia motangi kabilanga mboomo mia inda motangi, manga mia mokaunde-unde kabilanga mboomo mia inda mokaunde-unde, mia mopadhana moalina bara mboomo manga mia inda mokobara.

³¹ Atawa mboomo manga mia modhadhina mo'urusuna manga hali modhaangiana i dunia sii, incia tabeana adhadhi kabilanga mboomo mia inda mo'urusuna manga giu i dunia sii, roonamo dunia imatauta sii-sii bheamofu.

³² Iaku gauku ingkomiu bholi umeri pokaiana tee opeapo modhaangiana i nuncana dhadhimiu. Mia indapo mokobhawine tangkanamo

soo afikiriaka urusana tee Kawasana Opu, roonamo incia gauna bheapasanaa ngangarandana Kawasana Opu.

³³ Maka o mia mokobhawine alabhi afikiriaka urusana dunia, roonamo incia gauna apasanaa incana bhawinena,

³⁴ tee mboo sumai o fikirina apegui-giu. Bhawine inda mokawi atawa o kabuabua indapo mokawina alabhi ameriaka manga giu mopokaina tee Kawasana Opu mamudhaakana incia amangkilo, malape o badana atawa o rohina. Maka o bhawine mokawina ameriaka manga giuna dunia sii, tuaapa incia amembali apasanaa umanena.

³⁵ Iaku kupogau mboo sii to kalapemiu, mencuana kusakomiu to upewau manga giu incia sumai, maka o kapeeluaku mamudhaakana ingkomiu upewau manga giu mobanara tee usadhaadhaa uta'ati, tee uka mamudhaakana o fikirimiu tangkanamo i Kawasana Opu.

³⁶ Ande dhaangia o mia moabhina karona tee mopewauna giu inda momalape to kabuabua mopadhana ipoporaekana, tee ande incia indamo amembali ataangi nawusuuna, tee anamisia awaajibu ande akawamo o wakutuuna to akawiaka poraena sumai, maka taroakamo apewau mboomo opea iabhina amalape. Ande akawi, manga incia inda akodosa.

³⁷ Maka ande dhaangia o mia mopadhana moalana kambotu i nuncana ngangarandana, tee atotuu-totuu ayaakini inda atopakisaa tee aose kapeeluna mamudhaakana inda akawi tee kabuabua mopadhana ipoporaekana, siitumo

ipewauna sumai amalape.

³⁸ Tee mboo sumai, mia mokawiakana kabuabua mopadhana ipoporaekana, sumaimo incia apewau giu momalape, tee o mia indapo mokawi, sumaimo incia apewau giu molabhina kalapena.

³⁹ Samia bhawine mokoumane atobhoke tee umanena kangengena o umanena sumai dhaangiapo adhadhi. Maka ande o umanena sumai amatemo, bhawine sumai abebasimo to akawi tee incemapo uka ipeeluna, somanamo akawi tee mia moparacaeana tee Isa Al Masi.

⁴⁰ Siimo o fikiriku, incia bhealabhi amasanaa ande inda akawi pendua. Tee uka kuabhia opea mopadhana ibhoasakaku sii rampaakanamo kuasana Rohina Aulata'ala morahumatiaku.

8

Pasombaana Barahala

8:1-13

¹ Sii-sii bhekupogauaka pokaiana tee kinande mopadhana ipasombaaka to barahala. Inciamo atotuu mboomo pogauna mia, "Ingkita tamataua ande bhari-bharikita dhaangia tee katauta." Maka o katau mboo sumai imembaliakana mia asombo, sainamo kaasi apekatangka iimanita.

² Ande dhaangia i tanga-tangamiu moabhina karon a o mia mobharina ilmuuna, satotuuna o ilmuuna sumai indapo asangka.

³ Maka ande dhaangia o mia momaasiakana Aulata'ala, sumaimo Aulata'ala amataua o mia incia sumai.

⁴ Sainamo to pokaiana tee takande dagi mopadhana ipasombaaka to barahala, ingkita tamataua ande, "Satotuuna inda dhaangia o barahala i dunia sii," tee tamataua ande, "Aulata'ala sumai sakaro-karona, inda dhaangia o Aulata'ala mosagaanana."

⁵ Inciamo abhari uka opea isarongiaka aulata'ala tee opu; malape modhaangiana i laiana atawa modhaangiana i dunia.

⁶ Maka to ingkita, modhaangiana tangkanamo Aulata'ala sakaro-karona siitumo o Ama; Incia mopadhaangiana bhari-bharia giu, tee tadhadhi to talaiania. Tee tangkanamo sakaro-karona o Kawasana Opu, siitumo Isa Al Masi, tee alaloi Incia bhari-bharia giu atopadhaangia, tee alaloi Incia uka imembaliakata tadhadhi.

⁷ Maka moomini mboo sumai, inda bhari-bharia mia amataua o giu incia sumai. Dhaangia i piamo itu manga witinaita sa'agama mosombana barahala, sabutuna wakutuu manga incia akande dagina pasombaana sii-sii, manga incia anamisi ande dhaangiapo asomba barahala sumai, roonamo ngangarandana manga incia indapo amatangka, sabutuna o dagi sumai aabhia apekarombu karona.

⁸ Sainamo kinande inda bheamangapamembali tapomakasu tee Aulata'ala. Ande o kinande sumai inda takandea, ingkita inda tamarugi, tee ande o kinande sumai takandea, ingkita uka inda tapotibhaaka laba.

⁹ Maka upengkaanakamo! Ancosala o kabebasimiu sumai amembali bhatu itosunuakana mia indapo momatangkana

ngangarandana.

¹⁰ Ma'anana mboo sii: Ingkomiu umataua bhari-bharia kinande modhaangia i nuncana bhanuana ibaadatina mia mosombana barahala sumai amembali atokande, kasiimpo dhaangia o witinaimiu sa'agama indapo momatangkana antona ngangarandana akamatakomi ucura ukande iwe sumai. Atantumo incia uka bheabarani to akande kinande mopadhana ipasombaaka to barahala sumai, moomini i nuncana ngangarandana anamisi asala. Tee mboo sumai, ingkomiu imembaliakana manga incia akodosa.

¹¹ Tee mboo sumai, rampaakanamo kataumiu, sabutuna o mia inda momatangkana ngangarandana sumai abinasa, garaaka incia o witinaita sa'agama, tee o Al Masi amate to mia incia sumai uka.

¹² Jadi ande ingkomiu upewau kasalaha tee witinaimiu tee cara mboo sumai tee upekapii ngangarandana manga mia inda momatangkana ngangarandana sumai, sumaimo ingkomiu ukodosa uka tee Al Masi.

¹³ Jadi, ande o dagi ikandeku apamembali witinaiku mosa'agama apewau dosa, sumaimo iaku indamo bhekukande dagi sa'umurua, mamudhaakana inda kupamembali witinaiku mosa'agama akodosa.

9

Hakuna tee Iwaajibukana to Rasulu

9:1-27

¹ Buaka iaku mencuana samia maradhika? Buaka iaku mencuana samia rasulu? Buaka iaku mencuana mia mopadhana mokamatana

Isa Oputa Momalanga sumai? Buaka ingkomiu mencuana hasili ikarajaana Kawasana Opu alaloi iaku?

² Moomini o mia mosagaanana inda aabhiaku samia rasulu ilambokona Oputa Momalanga, maka iaku kuyaakini ingkomiu utarimaaku tee uabhiaku ande iaku sii samia rasulu! Roonamo kadhaangiamiu sii-sii udhadhi umembali mia Moparacaeana tee Isa Al Masi siitumo momembaliakana bukutii ande iaku kumembali rasulu.

³ Ande dhaangia o mia mopasalaaku, iaku bhekulawani mboo sii:

⁴ Satotuuna iaku tee Barnabas takohaku to tatarima kinande tee giu isumpu tee tampa butungamami i bhanuamiu wakutuuna taleongi ingkomiu.

⁵ Tee ande ingkami takobhawine mosa'agama, takohaku uka to tabhawa bhawinemami i nuncana lingkaamami mboomo ipewauna manga rasulu mosagaanana tee witinaina Oputa Momalanga, tee uka Kefas.*

⁶ Atawa tangkanamo iaku tee Barnabasmea mowaajibuna mokarajaana to dhadhimami saesaeo? *Inda! Satotuuna ingkami takohaku uka to tatarima tiriana inimami minaaka i jama'a ilaianimami.*

⁷ Incema buaka o suludadu motolambokona i tampana potimbea mopakena doina karonas? Incema buaka mopombulana angguru, maka inda akande bhakena i wakutuuna timpuana? Atawa incema buaka modhambaakana gulumana dumba, maka inda asumpu susuna dumba idhambaakana sumai?

* **9:5 9:5 Kefas:** Kefas sii atosarongi uka Petrus.

⁸ Iaku kupogauaka giu incia sii mencuana roonamo kuose fikirina maanusia, maka roonamo giu incia sii uka atoburi tee adhaangia i nuncana Hukumuna Taurati.

⁹ Roonamo i nuncana Hukumuna Taurati ipakawaakana Nabii Musa padhamo atoburi, "Sapi motangasaana molandalandakina gandum to mopapogaana kulina tee ompolena gandum, bholi ututubhia o ngangana." Buaka tangkanamo sapi ifaduliakana Aulata'ala to hukumu incia sii?

¹⁰ Buaka mencuana to kafaraluuta hukumu incia sii atoburi? Inciamo atotuu atoburi rampaakanamo ingkita, roonamo mia mobhingkunina tana alaenga abhingkuni tee aharapu, tee o mia mopapogaana ompolena gandum minaaka i kulina awaajibu akarajaaia tee aharapu ande incia bheapotibhaaka dhawuna.

¹¹ Ingkami padhamo tahewiakakomiu o wine mominaakana i Rohina Aulata'ala i nuncana ngangarandamiu, buaka ingkami inda alaenga ande taharapu tarombusaka kahamba minaaka i ingkomiu to dhadhimami saesaeo?

^{12a} Ande manga mia mosagaanana akohaku to apotibhaaka kahamba minaaka i ingkomiu, ntaranamo uka tee ingkami?

^{12b} Moomini mboo sumai, ingkami inda tapakea o haku incia sumai. Maka bhari-bharia tatanggoa karomami mamudhaakana inda tajoli-joli mia to atarima Lele Malapena Al Masi.

¹³ Buaka ingkomiu inda umataua ande manga

mia mokarajaana i Baitulla† apotibhaaka kinande minaaka i nuncana Baitulla sumai, tee manga mia mojananina tampana tunuana kurubani apotibhaaka uka dhawu minaaka i kurubani motopasombaakana iwe sumai?

¹⁴ Mboo sumai uka o Kawasana Opu padhamo apatotapuaka manga mia mopakoleleakana Lele Malape akohaku apotibhaaka opea ifaraluuna to dhadhina saesaeo minaaka i karajaana apakoleleaka Lele Malape sumai.

¹⁵ Moomini mboo sumai, inda sampearo uka mopadhana ipakeku minaaka i hakuku sumai. Iaku kuburi sura incia sii inda kukohaejati mamudhaakana manga giu incia sumai upewaua i karoku. Salabhina kumate tee kukailangaaka giu ibanggaakaku sumai.

¹⁶ Roonamo pokaiana tee iaku kupakawaaka Lele Malape, giu incia sumai inda amembali saangu alasa to kubanggaaka karoku roonamo tugasi incia sumai awaajibu kupewaua, tee tapanamo kaoge o balaa ipotibhaakaku ande inda kupakawaaka Lele Malape sumai.

¹⁷ Ande o giu incia sumai kupewaua kuose kapeeluana karoku, inciamo iaku tabeana kupotibhaaka fahala. Maka o giu incia sumai kupewaua roonamo tugasi mopadhana idhawuakana Aulata'ala to iaku, tee mencuana

† **9:13 9:13** *Baitulla:* Tampana miana Yahudi asomba Aulata'ala i Yerusalem. Tana incia sii aalia Raja Daud. Kasiimpomo Raja Suleiman o anana Daud abhangu Baitulla mobhaa-bhaana. Baitulla ibhanguna sumai to abholosiaka Kema Momangkilo minaaka i zamanina Nabii Musa. Kamata 1Taw. 21:24-28; 1Ra. 8. **9:14 9:14** Mat. 10:10; Luk. 10:7.

kapeeluaku karoku.

¹⁸ Ande mboo sumai, opea o fahalaku? Siimo fahalaku: Iaku kumembali kupakoleleaka Lele Malape sumai, tee wakutuuna kupakoleleakea iaku inda kuala ponambo, roonamo iaku inda kutuntu manga hakuku wakutuuna kukarajaa o tugasiku siitumo kupakoleleaka Lele Malape.

¹⁹ Iaku sii inda apabhatuaaku incemapo uka, maka moomini mboo sumai, karoku kupamembalia bhatua to molaianina bhari-bharia mia. Giu incia sumai kupewaua mamudhaakana ahanda abhari o mia ipakanaku.

²⁰ I aroana miana Yahudi, iaku kuose adatina manga incia mamudhaakana amembali kukemba manga incia to aoseaka Al Masi. I aroana manga mia moosena Hukumuna Taurati, iaku mboomo kutobhoke tee tutura incia sumai, maka satotuuna iaku inda kutobhoke tee hukumu incia sumai. Giu incia sumai kupewaua mamudhaakana manga incia amembali kukembaia to aose Al Masi.

²¹ I aroana manga mia inda moosena Hukumuna Taurati,[‡] iaku kupamembali karoku mboomo manga incia, maka moomini mboo sumai iaku inda kupabebasi karoku minaaka i hukumu mopadhana ipatotapuakana Aulata'ala, roonamo kuwaajibu kudhadhi i tambena kuasana hukumuna Al Masi. Giu incia sumai kupewaua mamudhaakana manga mia inda moosena Hukumuna Taurati amembali kukembaia to aoseaka Al Masi.

[‡] **9:21 9:21** *manga mia inda moosena Hukumuna Taurati: Ma'anana, manga mia inda motolentuna miana Yahudi.*

²² I aroana manga mia inda momatangkana ngangarandana, iaku kumembali mboomo manga incia mamudhaakana amembali kukembaia to aoseaka Al Masi. Atawa amembali uka iaku kupogau, iaku padhamo kupamembali karoku mboomo bhari-bharia mia mopadhana ilaianiku, mamudhaakana tee cara opeapo uka iaku kumembali kupasalaamati sagaa minaaka i manga incia.

²³ Bhari-bharia sumai kupewaua rampaakanamo Lele Malape, mamudhaakana iaku kupobhawa kupotibhaaka kabarakatina.

²⁴ Udhania ande i nuncana saangu pologoana buntuli, bhari-bharia mia moosena pologoa sumai aposabuntuli, maka tangkanamo samiamea mokbanana tee mopotibhaakana hadia. Rampaakanamo sumai ubuntulimo upekadheidhei mamudhaakana ingkomi uka tee upotibhaaka hadia.

²⁵ Tee uka, bhari-bharia mia moosena saangu pologoa, aporikana aparamananeaia mpuu o karon to ataangi nawusuuna minaaka i bhari-bharia giu. Manga incia aparamananeaia o karon roonamo gauna apotibhaaka saangu mahakota inda mobakaa, maka ingkita to tapotibhaaka saangu mahakota mobakaa.

²⁶ Mboo sumai uka tee karoku. Iaku mboomo mia mobuntulina i nuncana pologoa, roonamo dhaangia tee itujuku, atawa iaku mboomo mopobhalina i nuncana pobusua, kabusuku mencuana mboomo mia mobusuna ngalu.

²⁷ Maka o badaku kulatia tee kuparamananeaia to kukuasaia. Iaku kupewau mboo sumai ram-

paakanamo kumendeu, ancotala dhaangia tee kajadia tee karoku, sabutuna iaku samia inda kulaenga sapadhana kupakoleleaka Lele Malape to kukemba manga mia mosagaanana to aose pologoa sumai.

10

Israel Amembali Saangu Kaudhaniaka

10:1-22

¹ E manga witinaiku, ingkomiu tabeana uud-hania opea momembalina tee manga opu-opuata wakutuuna aose Nabii Musa, tee o Aulata'ala abhakesaka ta'ina ngalu to apapeuluaka manga incia tee apasalaamatia apolimba i Tawo Male'i.

² To amembaliaka manga mia moosena Musa, bhari-bharia manga incia padhamo atopapebhaho tee ta'ina ngalu tee tawo sumai.

³ Bhari-bharia manga incia akande kinande mopokana idhawuakana Aulata'ala tee cara inda momentela,

⁴ tee manga incia uka asumpu uwe mopokana mopadhana idhawuakana Aulata'ala, roonamo manga incia atorotorosu asumpu uwe ipalem-bona Aulata'ala minaaka i Bhatu ipasadiaakana Aulata'ala mopoosena tee manga incia, tee o Bhatu ipasadiaakana Aulata'ala sumai satotuuna o Al Masi.

⁵ Moomini mboo sumai, abhari mpuu minaaka i manga incia inda ipeeluna Aulata'ala. Ram-paakanamo sumai, ataroakea o maeatina manga incia amantale i tana matuu.

10:1 10:1 Limb. 13:21-22; 14:22-29.

10:3 10:3 Limb. 16:35.

10:4 10:4 Limb. 17:6.

⁶ Bhari-bharia manga kajadia incia sumai amembali sandarana karota, mamudhaakana ingkita inda tapeelu manga giu madhaki mboomo mopadhana ipeeluna manga incia.

⁷ Tee mamudhaakana ingkomiu uka inda umembali mia mosombana barahala mboomo ipewauna sagaa o mia mominaakana i manga incia. Giu incia sii mboomo iburina Musa i nuncana Kitabi Momangkilo, "Manga miana lipu sumai auncuramo to akande tee asumpu, kasiimpo akakaro tee akaunde-unde to asomba barahala."

⁸ Ingkita bholi tapewau pebula, mboomo ipewauna sagaa o mia minaaka i manga incia, sabutuna saeoa dhaangia rua pulu talu rewu mia momatena roonamo ahukumua Aulata'ala.

⁹ Bholi tauji kasabarana Oputa Momalanga* tee tapewau dosa mboomo ipewauna sagaa mia minaaka i manga incia, sabutuna abhari minaaka i manga incia momatena roonamo atompai ula mokobisa.

¹⁰ Tee bholi ukamburu-mburu mboomo peminguina sagaa mia minaaka i manga incia, sabutuna o Aulata'ala alamboko malaa'ekatina to apabinasaaka manga incia.

¹¹ Bhari-bharia giu mopadhana inamisina opu-opuata sumai amembali saangu sandarana karota, tee atoburi amembaliaka kaudhania to ingkita modhadhina i aahirina zamani sii.

¹² Rampakaanamo sumai, ande ingkomiu ufikiri karomiu umatangka ukakaro sumaimo

10:7 10:7 Limb. 32:6. **10:9 10:9** Kab. 21:5-6. * **10:9 10:9** *Oputa Momalanga*: Dhaangia uka manga kaburi mangenge mopakena saro, "Al Masi."

tabeana upengkaanaka, ancossala ukotibu i nuncana dosa.

¹³ Bhari-bharia kapancoba inamisimiu satotuna o kapancoba mobiasana inamisina maanusia. Tee o Aulata'ala sadia akeniakea o janjina; Incia inda bheataroakea akangkanaikomiu kapancoba alabhi minaaka i kakaamiu. Maka wakutuuna akangkanaikomiu kapancoba, Incia bheadhawukomiu dhala to umakaaka mamudhaakana umembali utaraia.

¹⁴ E manga witinai imaasiakaku, rampaakanamo sumai pekaridhoa o karomiu minaaka i sombaana barahala.

¹⁵ Iaku kupogau tee ingkomiu mboomo kupogau tee manga mia mo'aarifu. Jadi o karomiu momambotuakana pogauku sii abanara atawa inda.

¹⁶ Wakutuuna taudhani matena Isa Al Masi i kau salib tee cara tasumpu angguru minaaka i tonde mokokabarakati tee tabhoasaka tari-makaasi i Aulata'ala, buaka o giu incia sumai inda asusuaka ande ingkita taposaangu i nuncana raana Al Masi? Tee wakutuuna tabagebage roti to takandea tapobhawa-bhawa, buaka o giu incia sumai inda asusuaka ande ingkita taposaangu i nuncana badana Al Masi?

¹⁷ Roonamo soo saangumea o roti modhaangiana, tee bhari-bharikita takande minaaka i roti incia sumai, sumaimo bhari-bharikita sii satotuna saangu bada.

¹⁸ Mboomo uka manga miana Israel waku-tuuna apasombaaka kurubani *i aroana Bait-*

ulla tee akande dagina kurubani sumai, bhari-bharia mokandena dagi iwe sumai atoabhi mia moposaanguna tee tampana tunuana kurubani sumai.

¹⁹ Opea o ma'anana pogauku sumai? Barahala atawa o kinande ipasombaaka to barahala sumai inda tee ma'anana sampeampearo.

²⁰ Ma'anana pogauku sii, opea ipasombaaka i tampana kurubani to barahala, mencuana pasombaa to Aulata'ala, maka o pasombaa to manga seetani. Tee iaku kumendeu ande ingkomiu uposaangu tee manga seetani.

²¹ Ingkomiu inda umembali usumpu i ton-dena Kawasana Opu tee upoose usumpu uka i tonde motopakena to upasombaaka manga seetani. Mboomo uka ande ingkomiu ukande, inda amembali ukande i mejana Kawasana Opu, tee uka ukande i mejana manga seetani.

²² Buaka gauta tapewau ngangarandana Kawasana Opu agigibulu? Buaka alabhi o kakaata tee Kawasana Opu? Atantumo inda!

*Dhadhita to Tamuliangiaka Sarona Aulata'ala
10:23--11:1*

²³ Dhaangia o mia mopogauna, "Ingkita tamembali tapewau opeapo uka ipeeluta." Inciamo atotuu, maka inda bhari-bharia pewauta tee fa'edana. Dhaangia uka o mia mopogauna, "Ingkita tamembali tapewau opeapo uka ipeeluta," maka inda bhari-bharia amembali to aangkatakaaka iimanita.

²⁴ Bholi dhaangia samia uka mopeelona giu mokofa'eda tangkanamo to karonamea, maka ingkomiu tabeana upeelo mokofa'edana to mia mosagaanana uka.

²⁵ Ingkomiu umembali ukande bhari-bharia dagi motoasona i dhaoa tee inda ufaraluu uparakisaaia minaaka i iapai o asalana, mamudhaakana inda tee kasalaha i nuncana ngangarandamiu.

²⁶ Roonamo i nuncana Kitabi Momangkilo atoburi mboo sii, "Dunia tee bhari-bharia antona o pewauana Kawasana Opu."

²⁷ Ande dhaangia o mia mencuana mia moosena Al Masi mokembakomiu to ukande, tee ingkomiu utarimaia o kakembana sumai, sumaimo soo ukandemo opea ipatalaakana to ingkomiu, tee o kinande incia sumai inda afaraluu uparakisaaia minaaka i iapai o asalana, mamudhaakana inda tee kasalaha i nuncana ngangarandamiu.

²⁸ Maka ande dhaangia o mia mopogauna tee ingkomiu, "Kinande incia sii padhamo atopasombaaka to barahala," sumaimo bholimo ukandea, rampaakanamo incia apogauaka giu incia sumai roonamo fikiri modhaangiana i nuncana ngangarandana.

²⁹ Ma'anana opea ipogauakaku sii, mencuana fikiri modhaangiana i nuncana ngangarandamiu, maka o fikiri modhaangiana i nuncana ngangarandana mia incia sumai. Pokia o kabebasiku tabeana atantuakea fikirina ngangarandana mia mosagaanana?

³⁰ Ande kukande kinande tee kupotarimakaasi i Aulata'ala, pokia o mia apogauakaaku madhaki rampaakanamo kinande sumai, sainamo iaku padhamo kupotarimakaasi tee Aulata'ala?

³¹ Jadi, opeapo uka ipewaumiu, malape ukande atawa usumpu, upewaumea bhari-bharia sumai to umuliangiaka Aulata'ala.

³² Maka bholimo upewau giu motoabhina mos-ala, malape miana Yahudi, miana Yunani, atawa o jama'ana Aulata'ala. Tee mboo sumai ingkomiu inda upatosunu mia mosagaanana sabutuna manga incia akodosa.

³³ Iaku sadia ku'usaha i nuncana hali opeapo uka to kupasanaa ngangarandana bhari-bharia mia, tee inda soo kupeelo opea mokofa'edana to karoku, maka kupeelo opea mokofa'edana to mia bhari mamudhaakana manga incia amembali atopasalaamati.

11

¹ Pamembaliakumo sandarana karomiu, apokana uka mboomo iaku kupamembali Al Masi o sandarana karoku.

Katutubhina Bhaana Bhawine

11:2-16

² Iaku kupujikomiu, roonamo ingkomiu sadia uudhaniaku i nuncana bhari-bharia giu, tee sadhaadhaa uta'atia o kaadhari mopadhana ipakawaakaku to ingkomiu.

³ Maka iaku gauku bhekupaumbaakakomiu ande o Al Masi satotuuna mokapalaina bhari-bharia umane, apokana uka tee samia umane

mokapalaina bhawine, tee o Aulata'ala moka-palaina Al Masi.

⁴ Bhari-bharia umane motutubhina bhaana wakutuuna ado'a atawa wakutuuna apakawaaka kasameana Aulata'ala, sumaimo incia ahina Al Masi.*

⁵ Maka bhari-bharia bhawine inda motutubhina bhaana wakutuuna ado'a atawa wakutuuna apakawaaka kasameana Aulata'ala, satotuuna incia ahina umanena,† roonamo soo apokanamo tee agunti buluana.

⁶ Ande dhaangia o bhawine inda motutubhina bhaana, salabhina aguntia apepadhaia o buluana. Maka ande dhaangia o bhawine moguntina buluana atawa mokuruina buluana sumai aabhia amembali saangu hali motomaeaaka, sumaimo incia tabeana atutubhia o bhaana.

⁷ Umane inda alaenga atutubhia o bhaana, roonamo incia amembali gambarana tee kaogesana Aulata'ala, maka o bhawine amembali kaogesana umane,

⁸ roonamo umane inda aminaaka i bhawine, maka o bhawine mominaakana i umane.

⁹ Tee o umane atopadhaangia mencuana to bhawine, maka o bhawine atopadhaangia to umane.

¹⁰ Tee mamudhaakana uhoromati manga malaa'ekati mokamatana ibaadatimiu, bhawine awaajibu apake katutubhina bhaa to tandana

* **11:4 11:4** *ahina Al Masi*: Oni asiliina pogau incia sii satotuuna, "ahina bhaana." † **11:5 11:5** *ahina umanena*: Oni asiliina pogau incia sii satotuuna, "ahina bhaana." **11:7 11:7** Bhaa. 1:26-27.

11:8 11:8-9 Bhaa. 2:18-23.

ande incia akapalaia umanena.

¹¹ Moomini mboo sumai i nuncana dhadhita tamembali mia moosena Kawasana Oputa Momalanga, bhawine inda amembali apogaa tee umane, tee o umane inda amembali apogaa tee bhawine.

¹² Roonamo apokana tee bhawine aminaaka i umane, mboomo uka umane apalaahiria bhawine; tee bhari-bharia asalana aminaaka i Aulata'ala.

¹³ Coba ufikiria o giu incia sii: Buaka alaenga samia bhawine ado'a i Aulata'ala inda apake katutubhina bhaa?

¹⁴ Amembalimo saangu kaadhari tee giu imatauna mia bhari, ande o umane momaaratena buluana amembali saangu giu motomaeaaka.

¹⁵ Maka to bhawine, bulua adhawuakea to atutubhiaka bhaana, tee o bulua maarate amembali saangu kaogesa ibanggaaka.

¹⁶ Ande dhaangia o mia mopobantaakana giu incia sumai, sumaimo ingkami inda tee kananeamami to tapewau mboo sumai, tee uka manga jama'ana Aulata'ala inda tee kananeana mboo sumai!

Kananea Mosala i Wakutuuna Kariaa Momangkilo to Taudhani Matena Isa

11:17-34

¹⁷ To pokaiana tee giu ipogauakaku sii, iaku inda kupujikomiu, roonamo poromuamiu wakutuuna u'ibaadati inda aumbaaka kalape, maka aumbaaka kadhaki.

¹⁸ Bhaa-bhaana irangoku wakutuuna uporomu-romu, ingkomiu inda uposaangu tee

jama'amiu tee utobage amembali pia kolompo. Iaku sagaamea kuparacaea ande o lele incia sii atotuu.

¹⁹ Roonamo i tanga-tangamiu dhaanamo bheupogaa-gaa, mamudhaakana atokamata manga mia mototuu-totuuna tee mompuu-mpuuna moparacaeana Kawasana Opu.

²⁰ Tee moomini uka uporomu, ingkomiu inda uporomuaka to ukande kinandena kariaa momangkilona Kawasana Opu.

²¹ Roonamo akawa o wakutuuna ukande, bhari-bharikomiu ukande kinandemiu porikana, sabutuna dhaangia sagaa inda mopotibhaakana kinande, sainamo mosagaanana amalango.

²² Buaka ingkomiu inda tee bhanuamiu to ukande tee usumpu? Pokia ingkomiu upanda'ente jama'ana Aulata'ala tee uhaejati to upekaea manga mia momisikini? Bholi upewau mboo sumai! Jadi opea momembalina ipogauakaku to ingkomiu? Amembali buaka kupujikomiu i nuncana giu incia sii? Inda! Atantumo iaku inda sampeampearo bhekupujikomiu.

²³ Opea mopadhana itarimaku minaaka i Isa Oputa Momalanga, giumo incia sumai iadhariakaku uka to ingkomiu, siitumo i malona Isa Oputa Momalanga atohianati, Incia aala roti,

²⁴ tee sapadhana aemani sukuru i Aulata'ala, aweta-wetamea o rotina sumai tee apogau, "Si-imo badaku ipasaraakaaka to ingkomiu. Pe-waumea o giu incia sii to uudhaniaka Iaku."

²⁵ Sapadhana akande tee cara mopokana Incia

aalamo tonde tee apogau, "Tonde incia sii sato-tuuna o pojanjia bhaau motomateraiakana tee raaku. Pewaumea o giu incia sii to uudhaniaka Iaku gagari wakutuuna usumpua."

²⁶ Jadi gagari ingkomiu ukande roti tee usumpu angguru minaaka i tondena kariaa sumai, ma'anana apokanamo tee upakoleleaka mateana Isa Oputa Momalanga sakawana Incia aumba pendua.

²⁷ Rampaakanamo sumai, incema mokandena roti tee mosumpuna angguru minaaka i tondena kariaa momangkilo to taudhani matena Isa tee cara inda molaenga, sumaimo incia bheakodosa tee Oputa Momalanga mopadhana mokurubani-akana badana tee raana.

²⁸ Jadi, bhari-bharia mia tabeana parakisaa karona, kasiimpo amembali akande roti tee asumpu angguru minaaka i tonde sumai.

²⁹ Roonamo incema-incema mokandena roti tee mosumpuna angguru, maka inda a'akui badana Al Masi, sumaimo incia apokanamo tee aumbaaka kahukumu to karona.

³⁰ Rampaakanamo sumai abhari minaaka i tanga-tangamiu momalutena tee momapiina, tee sampe abhari uka momatena.

³¹ Maka ande aporikana taparakisaa karota, sumaimo ingkita inda bhetapotibhaaka kahukumu.

³² Maka ande mangahukumu Kawasana Opu, sumaimo Incia bheamangaadhari mamudhaakana inda tatohukumu tee dunia sii.

³³ E manga witinaiku, rampaakanamo sumai, wakutuuna uporomu-romu to ukande i kariaa

momangkilo to taudhani matena Isa, ingkomiu tabeana upoantaantagi tee witinaimiu.

³⁴ Ande dhaangia o mia monamisina kaara, salabhina akandepo porikana i bhanuana mamudhaakana o poromu-romuana ibaadatimiu sumai inda aumbaaka kahukumu to ingkomiu. Sainamo to hali mosagaanana kuumbapo kasi-impō ku'atoroa.

12

Sagala Giuna Rahumati, Maka Aminaaka i Saangu Rohi

12:1-11

¹ E manga witinaiku, sii-sii iaku gauku kupumbaakakomiu to pokaiana tee manga rahumati mominaakana i Rohina Aulata'ala.

² Udhania wakutuuna ingkomiu indapo uparacaea tee Isa Al Masi, dhaangia tee saangu kuasa mowujukomiu tee mopasaladhalakomiu to usombaaka manga barahala inda momembalina mopogau.

³ Rampaakanamo sumai, ingkomiu tabeana umataua ande o mia ikuasaina Rohina Aulata'ala inda amembali apogau, "Atotundamo o Isa!" Tee inda samia uka momembalina mopogauna, "Isa Al Masi o Kawasana Opu," ande o mia incia sumai inda akuasaia Rohina Aulata'ala.

⁴ Inciamo dhaangia pegiu-giu o rahumati, maka bhari-bharia rahumati sumai aminaaka i saangu Rohi Momangkilo.

⁵ Dhaangia pegiu-giu o carana mia to alai-
iani Kawasana Opu, maka ilaianina tangkanamo
saangu Kawasana Opu.

⁶ Mboomo sumai o Aulata'ala akarajaa tee
pegiau-giuna cara inda momentela i nuncana
karona samia-samia witinai mosa'agama, maka
bhari-bharia o Aulata'ala sakaro-karona mokara-
jaaia.

⁷ Maka o Aulata'ala adhawu saangu bukutii
pokaiana tee umbaana Rohina to bhari-bharia
mia, mamudhaakana apakea to atulungiaka
bhari-bharia jama'a.

⁸ Roonamo Rohi Momangkilo adhawuakea
rahumatina kapooli to mia, mamudhaakana
apakawaaka kasamea mobukeakana tee
hikimati, tee o Rohi Momangkilo mopokana
adhawuakea uka o rahumatina to mia
mosagaanana mamudhaakana apakawaaka
kasamea mobukeakana tee katau.

⁹ Rohi Momangkilo incia sumai uka
adhawuakea rahumatina momaoge to mia
mamudhaakana aparacaea tee Al Masi, sainamo
to mia mosagaanana adhawuakea rahumatina
alaloi Rohi Momangkilo incia sii to apauntoaka
mia momapii.

¹⁰ Rohina Aulata'ala adhawuaka rahumatina to
mia mamudhaakana apewau manga muuzizati,
kasiimpo to mia mosagaanana adhawuakea
rahumatina mamudhaakana apakawaaka
kasameana Aulata'ala, kasiimpo to mia
mosagaanana uka adhawuakea rahumatina
mamudhaakana amembali apaposala Rohina
Aulata'ala tee rohi mencuana mominaakana

i Aulata'ala, kasiimpo dhaangia uka o mia mosagaanana adhawuakea rahumatina mamudhaakana amembali abhoasaka pogau inda momentela mominaakana i Rohina Aulata'ala, tee dhaangia uka o mia mosagaanana adhawuakea rahumatina mamudhaakana amembali ama'anaiaaka manga pogau inda momentela mominaakana i Rohina Aulata'ala sumai.

¹¹ Maka bhari-bharia sumai apewaua saangu Rohi mopokana, tee o rahumati sumai abageakea i bhari-bharia mia mboomo kapeeluana Rohina Aulata'ala.

Saangu Bada Maka Abhari o Parewana

12:12-31

¹² Apokana mboomo badana maanusia tangkanamo saangumea, maka o bada atopebhangui minaaka i parewa mobhari, tee bhari-bharia parewana bada sumai moomini abhari maka aposaangu tee bada, mboo sumai uka tee badana Al Masi.

¹³ Mboo sumai uka bhari-bharikita, malape miana Yahudi atawa o miana Yunani, manga bhatua atawa manga maradhika, Aulata'ala padhamo mangapapebhaho i nuncana Rohi mopokana, mamudhaakana tamembali saangu bada, tee bhari-bharikita uka padhamo tatarima Rohi mopokana sumai i nuncana ngangarandata.

¹⁴ Roonamo parewana bada mencuana soo saangumea, maka abhari o parewana.

¹⁵ Ibaratina ande o ae apogau tee bada, "Iaku mencuana lima, jadi iaku mencuana parewana

bada," maka moomini mboo sumai o ae asadhaadhaa amembali parewana bada.

¹⁶ Tee ande o talinga apogau, "Iaku mencuana mata, jadi iaku mencuana parewana bada," maka moomini mboo sumai o talinga asadhaadhaa amembali parewana bada.

¹⁷ Kera-kera ande bhari-bharia parewana bada tangkanamo soo mata, tuaapa o carana bada sumai amembali aporango? Atawa ande bhari-bharia parewana bada tangkanamo soo talinga, tuaapa o bada sumai amembali apebhau?

¹⁸ Maka o Aulata'ala padhamo adhikaia o parewana bada saasaangu apokana mboomo ipeeluna.

¹⁹ Ande bhari-bharia apamembalia tangkanamo saangu parewamea, iapai o bada?

²⁰ Jadi o parewana bada sumai inciamo abhari, maka o bada tangkanamo saangu.

²¹ Rampaakanamo sumai, mata inda amembali apogau tee lima, "Iaku inda kufaraluuko!" Atawa o bhaa apogau tee ae, "Iaku inda kufaraluuko!"

²² Maka manga parewana bada motoabhina momalute sumai satotuuna ifaraluu mpuu.

²³ Mboomo uka tee manga parewana bada iabhi inda mofaraluuna iharagaangi, tabeana alabhi atoharagaangi. Sainamo manga parewana bada inda molaengana to ipatokamata ingkita tatutubhia tee pakea,

²⁴ roonamo manga parewana bada molaengana to ipatokamata inda afaraluu tatutubhia. Aulata'ala satotuuna padhamo a'atoroa o bada mboo sumai, sabutuna o parewana bada moku-rana motoharagaangi alabhi atohoromati,

²⁵ mamudhaakana o bada inda apogaa-gaa, maka bhari-bharia parewana bada tabeana apo-maamaasiaka.

²⁶ Ande dhaangia minaaka i sala saangu parewana bada monamisina kanarakaa, sumaimo bhari-bharia parewana bada aposanarakaa uka. Ande dhaangia sala saangu minaaka i parewana bada atomuliangi, sumaimo bhari-bharia parewana bada aposakaunde-unde uka.

²⁷ Bhari-bharikomiu satotuuna o badana Al Masi, tee ingkomiu samia-samia o parewana badana.

²⁸ Mboomo uka i nuncana jama'a, Aulata'ala padhamo atantuaka tampana bhari-bharia mia: Bhaa-bhaana manga rasulu, kasiimpo manga mia mopakawaakana kasameana Aulata'ala,* tee manga guru, sapadhana incia sumai manga mia momembalina mopewauna muuzizati, manga mia motodhawuakana rahumati to apaunto kapiina mia tee momembalina motulungina mia mosagaanana, mia momembalina kapala, atawa mopogauna tee pogau inda momentela irahumatina Rohina Aulata'ala.

²⁹ Buaka bhari-bharia manga incia amembali rasulu atawa o nabii tee guru? Buaka manga incia bhari-bharia tee kuasana to apadhaangia muuzizati?

³⁰ Buaka bhari-bharia manga incia apotibhaaka rahumati to apaunto kapiina mia, atawa amembali apogau tee pegiu-giuna pogau inda

12:28 12:28 Ef. 4:11.

* 12:28 12:28 *manga mia mopakawaakana kasameana Aulata'ala:* I nuncana sura asilii atoburi, "manga nabii," maka mencuana tangkanamo soo manga mia minaaka i zamani momangengena.

momentela, atawa to ama'anai manga pogau incia sumai?

³¹ Rampaakanamo sumai, ingkomiu tabeana u'usaha tee mpuu-mpuuna incamiu to upotibhaaka rahumati molabhina kaogena.

Tee iaku bhekususuakakomiu dhala molabhina kalapena.

13

Namisina Ngangaranda

13:1-13

¹ Moomini kumembali kupogau tee pegiugiuna pogau ipakena maanusia tee pogau ipakena malaa'ekati, maka ande inda kumaasiaka mia mosagaanana, sumaimo iaku kupokanamo tee nduuna mbololo atawa o nduuna ndengundengu.

² Moomini dhaangia tee rahumatiku mominaakana i Aulata'ala to kupakawaaka kasameana tee adhawuakaaku katau mamudhaakana kuma'anaia bhari-bharia rahasiana, tee rampaakanamo kaparacaeaku tee Aulata'ala sabutuna iaku amembali kupapinda gunu, maka ande inda kumaasiaka mia mosagaanana, sumaimo iaku inda tee fa'edaku sampeampearo.

³ Moomini bhari-bharia pewauaku kusadakaakea to mia misikini, tee kupasaraakaakea

o karoku to atotunu,* maka ande inda kumaasiaka mia mosagaanana, sumaimo moomini saidhe inda dhaangia o fa'edana to karoku.

⁴ Mia momaasiakana mia mosagaanana, sadia asabara tee amalape incana. Incia inda agigibulu tee mia mosagaanana, inda abanggaaka karona tee inda asombo.

⁵ Incia inda apewau giu inda moko'adati, inda alabhiaka karona, inda amasimba a'amara, tee inda audhaudhani kasalahana mia mosagaanana.

⁶ Incia inda akaunde-unde rampaakanamo giu inda mo'adili, maka rampaakanamo giu moba-nara.

⁷ Incia atarai kanarakaa i nuncana bhari-bharia kanarakaa, aparacaea bhari-bharia giu *momalape to mia mosagaanana*, aharapu tee sagala giu, tee sadia asabara atarima opeapo uka inamisina.

⁸ Kaasi bheadhaangia sa'umurua! Sii-sii dhaangia o mia momakidha to mopakawaakana kasameana Aulata'ala, maka naile itu bheaunto apakawaaka kasamea incia sumai. Sii-sii dhaangia o mia momakidha tee mopakena pogau inda momentela irahumatina Rohina Aulata'ala, maka naile itu bheaunto apake pogau inda momentela incia sumai. Tee sii-sii dhaangia uka o mia momatauna manga giu irahasiaaka, maka naile

* **13:3 13:3** *kupasaraakaakea o karoku to atotunu*: Dhaangia pia angu o kaburina aeati incia sii mominaakana i zamani mangenge motoburi tee antona mboo sii: Badaku kupasaraakaakea to anarakaa mamudhaakana amembali kubanggaaka karoku.

itu manga katau irahumatina Rohina Aulata'ala incia sumai indamo bheatodhawuaka pendua.

⁹ Roonamo katauta tee kapoolita to tapakawaaka kasameana Aulata'ala mopadhana itarimata indapo asangka.

¹⁰ Maka ande akawamo wakutuuna, Aulata'ala bheapasangkea bhari-bharia, sumaimo kapoolita indapo mosangkana sii indamo bheatofaraluu.

¹¹ Wakutuuna iaku dhaangiapo kumaidhiidhi, pogauku, fikiriku tee o potontoku mboomo anaana maidhiidhi. Maka sadewasaku, pemingkuiku wakutuuna kumaidhiidhi kubhanakamea.

¹² Opea ikamatata sii-sii mboomo takamata ngkamia-miata inda motindana i nuncana pa-iasa. Maka ande akawamo o wakutuuna siim-pomo atinda takamatea. Sii-sii indapo dhaangia imatauta, maka naile itu bhari-bharia sumai bhetamataua apokana mboomo Aulata'ala am-atau bhari-bharia o kadhaangiana karota.

¹³ Jadi sii-sii dhaangia talu hali tee mosad-haadhaana bheikeniakata siitumo: taparacaea, taharapu i Aulata'ala, tee uka tapomaamaasi-aka tee mia mosagaanana. Maka motofaralu-una mpuu minaaka i talu giuna sumai siitumo tamaasiaka mia mosagaanana.

14

*Pokaiana Tapakawaaka Kasameana
Aulata'ala to Tapogauaka Pogau Inda Momentela
Irahumatina Rohina Aulata'ala
14:1-25*

¹ Ingkomiu tabeana u'usaha to umaasiaka manga mia mosagaanana. Tee uka u'usahamo to utarimaaka manga rahumati minaaka i Rohina Aulata'ala, mofaraluuna mpuu siitumo kapoolimiu to upakawaaka kasameana Aulata'ala to maanusia.

² Incema mopogauna tee pogau inda momentela irahumatina Rohina Aulata'ala, incia inda apogau tee maanusia, maka apogau tee Aulata'ala. Tee uka inda dhaangia o mia moma'anaina pogauna, roonamo Rohina Aulata'ala mosababuakana mia incia sumai tangkanamo apogauaka manga giu soo imatauna Aulata'ala.

³ Maka to mia mopakawaakana kasameana Aulata'ala, apakawaakea i maanusia to apekatangkaaka iimanina, apekaoge incana, tee ahiburu manga incia.

⁴ Incema mopogauna tee pogau inda momentela irahumatina Rohina Aulata'ala incia apekatangka karonā, sainamo mia mopakawaakana kasameana Aulata'ala siitumo mia mopekatangkana jama'a.

⁵ Amalape mpuu ande bhari-bharikomiu umembali upogau tee manga pogau inda momentela irahumatina Rohina Aulata'ala. Maka kupeelua mpuu ande bhari-bharikomiu umembali upakawaaka kasameana Aulata'ala. Roonamo mia mopakawaakana kasameana Aulata'ala sumai alabhi akofa'eda minaaka i mia momembalina mopogauakana pogau inda momentela irahumatina Rohina Aulata'ala, tabeana o mia incia sumai amembali apajelasiakea opea ipogauakana to

apektangkaaka jama'a.

⁶ E manga witinaiku, buaka akofa'eda to ingkomiu ande iaku kuumba tee kupogauaka pogau inda momentela irahumatina Rohina Aulata'ala tee ingkomiu? Buaka inda bheal-abhi akoguna ande iaku kupogau tee pogau ima'anaimiu, malape wakutuuna kupakawaaka wahiyuu, katau, kasameana Aulata'ala, atawa o kaadhari?

⁷ Apokana uka tee manga giu inda mokoinyawa momembalina mokooni, mboomo suli tee kecapi. Ande o suli tee kecapi inda apalimba oni motinda, tuaapa amembali o mia bheamatau opea motan-gasaana imagasiaakana sumai?

⁸ Ande onina torompe* inda atinda, incema bhemopasiapuna karonu to potimbea?

⁹ Mboomo uka ingkomiu, ande upogau tee pogau inda motoma'anai, tuaapa amembali o mia ama'anai opea ipogauakamiu? Tee mboo sumai, ingkomiu kabilanga upogau tee ngalu.

¹⁰ Atantumo i dunia sii abhari mpuu o pogau, maka inda dhaangia saangu uka minaaka i kab-harina pogau sumai inda mokoma'anana.

¹¹ Maka ande iaku inda kuma'anai pogau ib-hoasakana mia, sumaimo o mia mopakena pogau incia sumai aabhiaku mia dhaga, mboomo uka iaku kuabhi ande o mia incia sumai o mia dhaga.

¹² Mboomo uka tee ingkomiu, inciamo in-

* **14:8 14:8** *onina torompe*: I zamani momangenge onina torompe to kapaumbana potimbea tee kakemba to manga suludadu mamudhaakana amaju apoewangi atawa amunduru.

gkomiu utotuu-totuu u'usaha to upotibhaaka manga rahumati minaaka i Rohina Aulata'ala, maka u'usahamo to upotibhaaka motofaraluuna mpuu, siitumo momembalina mopektangkana jama'a.

¹³ Rampaakanamo sumai, mia mopogauna i nuncana pogau inda momentela irahumatina Rohina Aulata'ala, tabeana ado'a mamudhaakana amembali apajelasiaka opea ipogauakana sumai.

¹⁴ Roonamo ande kudo'a tee pogau inda momentela irahumatina Rohina Aulata'ala, sumaimo tangkanamo rohiku modo'ana, sainamo akalaku inda aose ado'a.

¹⁵ Jadi opea bheipewauku? Iaku bhekudo'a tee rohiku, tee bhekudo'a tee akalaku uka. Iaku bhekulagu tee rohiku, tee bhekulagu tee akalaku uka.

¹⁶ Roonamo ande soo uemani sukuru tee rohimu, tuaapa tee mia inda mokorahumati amembali apogau, "Aamin" minaaka i bhoasakana kasukurumu rampaakana incia inda ama'anai opea ipogauakamu?

¹⁷ Jadi moomini o bhoasakana kasukurumi sumai amalape, maka inda tee fa'edana to mia mosagaanana.

¹⁸ Iaku kusukuru i Aulata'ala roonamo kumembali kupogau tee manga pogau inda momentela irahumatina Rohina Aulata'ala alabhi minaaka i bhari-bharikomiu.

¹⁹ Maka i nuncana poromu-romuana jama'a, iaku alabhi kumaasiaka kubhoasaka lima angu oni mominaakana i akalaku tee kubhoasaka sapulu rewu oni minaaka i pogau inda momentela

irahumatina Rohina Aulata'ala mamudhaakana amembali kuadhari mia mosagaanana.

²⁰ E manga witinaiku, fikirimiu bholi upamembalia mboomo anaana. Inciamo i nuncana giu madhaki, uwaajibu umembali mboomo anaana, maka i nuncana fikirimiu tabeana upamembalia adewasa.

²¹ I nuncana Kitabi Momangkilo atoburi, "Kawasana Opu apogau,

'Minaaka i manga mia moposalana pogauna
tee alaloi ngangana manga mia dhaga,
Iaku bhekupogau tee lipu sii.

Moomini mboo sumai, manga incia inda
bheaperangoiaku.' "

²² Jadi manga pogau inda momentela mominaakana i Rohina Aulata'ala satotuuna o tanda to manga mia inda moparacaea, mencuana to manga mia moparacaea. Tee o rahumati to tapakoleleaka kasameana Aulata'ala to maanusia satotuuna o tanda to manga mia moparacaea, mencuana to manga mia inda moparacaea.

²³ Rampaakanamo sumai ande bhari-bharia jama'a aporomusaka tee apogau i nuncana manga pogau inda momentela irahumatina Rohina Aulata'ala, kasiimpo dhaangia manga mia mopesuana minaaka i sambalina jama'a atawa manga mia inda moparacaeana tee Isa, atantumo manga mia incia sumai bheaabhikomiu umagila!

²⁴ Maka ande bhari-bharikomiu upakawaaka kasameana Aulata'ala, kasiimpo dhaangia o mia

i sambalina jama'a atawa manga mia inda moparacaeana tee Isa, sumaimo bhari-bharia giu ipakoleleakamiu sumai bheasusuaka dosana manga incia, tee manga incia bheasadaria o dosana.

²⁵ Tee mboo sumai, bhari-bharia rahasia motobuniakana i nuncana ngangarandana bheatokamata, sabutuna incia bheasuju asomba Aulata'ala tee bhea'akuia ande o "Aulata'ala atotuu-totuu adhaangia i tanga-tangamiu."

Tutura i nuncana Poromu-romuana Jama'a
14:26-40

²⁶ E manga witinaiku, jadi opea ma'anana bhari-bharia sumai? Ande ingkomiu uporomusaka to usomba Kawasana Opu, kasiimpo ingkomiu samia-samia dhaangia tee molaguna, moadharina, mopogauakana wahiyuu, mopogauakana pogau inda momentela irahumatina Rohina Aulata'ala, tee mopajelasiakana pogau incia sumai, bhari-bharia giu incia sumai tabeana tapewaua to tapekatangkaaka jama'a.

²⁷ Maka ande dhaangia o mia mopogauna tee pogau inda momentela irahumatina Rohina Aulata'ala, salabhina podhomo rua mia atawa tapanamo kabhari talu mia tee manga incia apobholobholosi apogau, tee tabeana dhaangia samia to mopajelasiakana opea ipogauakana sumai.

²⁸ Ande inda dhaangia o mia momembalina mopajelasiakea, manga incia tabeana bholi ako'uu i nuncana poromu-romuana jama'a sumai

tee taroakamo manga incia apogau i nuncana ngangarandana tee Aulata'ala.

²⁹ To manga incia mopotibhaakana rahumati amembali nabii, sumaimo podhomo rua mia atawa talu mia mopakawaakana kasameana Aulata'ala, sainamo mosagaanana mopotimban-giakea.

³⁰ Maka ande dhaangia o mia mosagaanana mouncurana iwe sumai mopotibhaakana wahiyuu minaaka i Aulata'ala, sumaimo o mia motangasaana mopogauna sumai tabeana aunto apogau.

³¹ Tee cara mboo sumai, bhari-bharikomiu tee kalalesamiu to upopakawaaka kasameana Aulata'ala podho-podho ingkomiu samia-samia, mamudhaakana bhari-bharikomiu amembali upotibhaaka kaadhari tee atopekaoge incamiu.

³² Rahumatina Rohina Aulata'ala to tapakawaaka kasameana Aulata'ala aose tee akuasaia nabii mokorahumatina sumai,

³³ roonamo Aulata'ala inda amaasiaka karompa, maka amaasiaka dhadhi mo'amani.

Apokana uka mboomo i nuncana poromusakaana manga jama'ana mia mosaalihi,

³⁴ manga bhawine tabeana bholi ako'uu i nuncana jama'a. Manga incia inda atoundaaka to apogau, maka manga incia tabeana apatungku karona. Giu incia sii mboomo motoburina i nuncana Hukumuna Taurati.

³⁵ Ande manga incia gauna amatau saangu giu, manga incia tabeana aabhaakea i umanena i bhanua. Inciamo atomaeaaka ande samia bhawine apogau i nuncana poromu-romuana jama'a.

³⁶ Buaka o firimanina Aulata'ala sumai aumba minaaka i ingkomiu? Atawa tangkanamo to ingkomiumea o firimani sumai atopakawaaka?

³⁷ Ande dhaangia o mia moabhina karna nabii mopotibhaakana rahumati to apakawaaka kasameana Aulata'ala atawa o mia mopotibhaakana rahumatina Rohina Aulata'ala mosagaanana, incia tabeana amataua, ande opea iburiku sii satotuuna o parintana Kawasana Opu.

³⁸ Maka ande incia inda atarima giu incia sumai, sumaimo ingkomiu bholi uperangoia.

³⁹ E manga witinaiku, jadi rampaakanamo sumai, usahamo to upakawaaka kasameana Aulata'ala, tee bholi usasi mia bhemopogauna tee manga pogau inda momentela irahumatina Rohina Aulata'ala.

⁴⁰ Maka bhari-bharia tabeana amalape upe-waua tee amalape u'atoroa.

15

Dhadhiana Pendua Isa Al Masi

15:1-11

¹ E manga witinaiku, sii-sii bhekupaumbaakakomiu pendua o Lele Malape minaaka i Aulata'ala mopadhana ipakawaakaku to ingkomiu i piamo itu. Ingkomiu utarimaia o Lele Malape sumai tee usadhaadhaa uparacaeia.

² Rampaakanamo Lele Malape sumai ingkomiu utopasalaamati, tee ande ingkomiu inda upengkeni pekatangka i firimani mopadhana ipakoleleakaku, sumaimo inda dhaangia o fa'edana uparacaea.

³ Roonamo giu mofaraluuna mpuu ipakawaakaku to ingkomiu satotuuna opea mopadhana itarimaku karoku, siitumo ande o Al Masi amate roonamo dosata, mboomo mopadhana motoburina i nuncana Kitabi Momangkilo,

⁴ tee Incia padhamo atokoburu, maka sapadhana sumai atopadhadhimo pendua i eo talu eona mboomo motoburina i nuncana Kitabi Momangkilo.

⁵ Incia padhamo apatiumba karona i Kefas,* kasiimpo apatiumba karona uka i sapulu rua miaia murina.

⁶ Sapadhana incia sumai, i wakutuu mopokana uka Incia apatokamata karona i lima atu mia labhi witinaita mosa'agama. Abhari minaaka i manga witinaita sumai dhaangiapo modhadhina sakawana sii-sii, maka dhaangia uka momatena.

⁷ Sapadhana incia sumai, Incia apatokamataaka uka karona tee Yakub, kasiimpo tee bhari-bharia rasuluna.

⁸ Tee o kapadhaana Incia apatokamataaka karona tee iaku, garaaka iaku mboomo anaana molaahirina i wakutuu mosala.

⁹ Roonamo minaaka i kabharina manga rasulu iakumo sii inda mopentingna mpuu, iaku inda kulaenga to kutosarongi samia rasulu, roonamo iaku padhamo kusikisaa jama'ana Aulata'ala.

¹⁰ Maka rampaakanamo rahumatina

15:3 15:3 Yes. 53:5-12. **15:4 15:4** Zab. 16:8-10; Mat. 12:40; Tul. 2:24-32. **15:5 15:5** Mat. 28:16-17; Mrk. 16:14; Luk. 24:34-36;

Yah. 20:19. * **15:5 15:5** *Kefas*: Kefas sii atosarongi uka Petrus.

15:8 15:8 Tul. 9:3-6. **15:9 15:9** Tul. 8:3.

Aulata'ala, iaku kumembalimo mboomo sii-sii, tee o rahumatina idhawuakana to iaku inda asia-sia, roonamo kakaana kukarajaa alabhi minaaka i bhari-bharia rasulu mosagaanana. Satotuuna mencuana iaku, maka o rahumatina Aulata'ala mopoosena tee iaku.

¹¹ Jadi, minaaka i incemapo uka utarima Lele Malape sumai, malape minaaka i iaku atawa minaaka i rasulu mosagaanana inda tee masa'alana. Roonamo mofaraluuna mpuu ande ingkami mopakoleleakana Lele Malape sumai, tee ingkomiu uparacaeaia.

Dhadhiana Pendua Maanusia Minaaka i Mate 15:12-34

¹² Ande tapakoleleakakomiu pokaiana tee dhadhiana pendua Al Masi minaaka i mate, tuaapa amembali dhaangia o mia minaaka i tanga-tangamiu mopogauna ande inda dhaangia o mia bhemotopadhadhina pendua minaaka i mate?

¹³ Ande atotuu o mia mate inda atopadhadhi pendua minaaka i mate, sumaimo Al Masi uka inda atopadhadhi pendua.

¹⁴ Tee ande o Al Masi inda atopadhadhi pendua minaaka i mate, asia-siamo opea mopadhana ipakoleleakamami tee asia-siamo iimanimiu.

¹⁵ Ande inda dhaangia o mia modhadhina pendua minaaka i mate, ma'anana ingkami padhamo tagau-gau tee taadhariaaka kaadhari mosala pokaiana tee Aulata'ala, roonamo kangengena sii ingkami tapakoleleaka ande o Aulata'ala mopadhadhina pendua Al Masi minaaka i mate, garaaka o Aulata'ala inda apadhadhia pendua. Ande o

giu incia sumai atotuu abanara, siitumo mia mate inda atopadhadhi pendua.

¹⁶ Roonamo ande atotuu o mia mate inda atopadhadhi pendua, sumaimo Al Masi uka inda atopadhadhi pendua.

¹⁷ Jadi ande o Al Masi inda atopadhadhi pendua minaaka i mate, sumaimo asia-siamo iimanimi u tee ingkomi u dhaangiapo akuasaikomiu dosa.

¹⁸ Tee mboo sumai, bhari-bharia mia momatena i nuncana saron Al Masi abinasamo.

¹⁹ Ande o kaharaputa i Al Masi tangkanamo to dhadhita i nuncana dunia sii, sumaimo ingkita tamembali mia motomaasiakana inca mpuu minaaka i bhari-bharia maanusia i dunia sii!

²⁰ Maka satotuuna, inciamo Al Masi padhamo atopadhadhi pendua minaaka i mate. Incia amembali mia mobhaa-bhaana motopadhadhina pendua minaaka i bhari-bharia mia momate.

²¹ Roonamo kadhaangiana mate mopesuana i nuncana dunia alaloi samia maanusia, mboo sumai uka o kadhaangiana mia motopadhadhina pendua minaaka i mate alaloi samia maanusia uka.

²² Roonamo bhari-bharia mia mate aminaaka i anana Adamu, maka bhari-bharia maanusia moposaanguna tee Al Masi bheatopadhadhi pendua.

²³ Maka samia-samia atopadhadhi aose palina: Bhaa-bhaana o Al Masi, kasiimpo manga incia momembalina pewauana Al Masi wakutuuna umbaana naile itu.

²⁴ Sapadhana incia sumai akiaamatimo; wakutuu incia sumai o Al Masi bheapekatalo bhari-bharia pamarinta, bhari-bharia kuasa, tee bhari-bharia kakaa. Kasiimpo Incia

bheapasaraakaakea o pamarintana i Aulata'ala o Amata.

²⁵ Roonamo Al Masi tabeana aparinta tee amembali Raja sakawana o Aulata'ala adhika bhari-bharia musuna i randana aena.

²⁶ Musuna kapadhaana bheipekatalona situmo o mate.

²⁷ Roonamo i nuncana Kitabi Momangkilo atoburi, "bhari-bharia giu padhamo apekataloa Aulata'ala tee adhikaia i randana aena," tee moomini bhari-bharia giu padhamo apekataloakea to Al Masi, maka atindamo mpuu ande o Aulata'ala inda apesua i nuncana kalentuna giu ipekatalo sumai.

²⁸ Jadi sapadhana bhari-bharia giu atodhika i randana aena Al Masi, sumaimo o Ana bheapasaraakaaka karonā i Aulata'ala modhikana bhari-bharia giu i randana aena Al Masi, mamudhaakana o Aulata'ala moparintana bhari-bharia giu.

²⁹ Ande o mia mate inda atopadhadhi pendua, apokia dhaangia o mia motopapebhahona to mia mate?[†] To opea manga incia apewau giu incia sumai? Ande atotuu o mia mate inda sampeampearo inda bheatopadhadhi pendua, apokia manga incia atopapebhaho to manga mia incia

15:25 15:25 Zab. 110:1. **15:27 15:27** Zab. 8:7. [†] **15:29 15:29** *mia motopapebhahona to mia mate*: Kaabhaki incia sii asusuaka saangu kananeana jama'a i Korintus motopapebhahona i nuncana saronā manga sabhangkana, atawa o witinaina momatena wakutuuna indapo atopapebhaho. Maka o Paul inda aundaakea o kananea incia sumai, tee tangkanamo atopake to amembaliaka bukutii. Manga incia satotuuna amataua ande manga mia mate bheatopadhadhi pendua.

sumai?

³⁰ Mboo sumai uka tee ingkami, apokia ingkami sadia taunda tapoaroaka balaa *ande o mia momate inda bheatopadhadhi pendua?*

³¹ E manga witinaiku, saesaeo iaku kupoaroaka balaa. Iaku kupotunda ande o giu incia sumai atotuu, apokana uka mboomo iaku kubang-gaakakomiu. Roonamo ingkomiumo momembalina bukutiina ande iaku kulaiani Isa Al Masi o Oputa Momalanga.

³² Ande taose fikirina maanusia, opea o fa'edana to iaku kupoewangi tee manga binata masega i Efesus?‡ Mencuana soo incia sumai, ande o mia momate inda atopadhadhi pendua, salabhina taose onina mia mopogauna, "Maimo *takokariaaka*, takande tee tasumpuaka, roonamo naile ingkita bhetamate."

³³ Bholi usaladhala, "Posabhangkaa inda momalape apekadhaki kananea momalape."§

³⁴ Sadaramo pekalah, tee bholimo upewau dosa pendua uka roonamo i tanga-tangamiu dhaangia o mia inda momatauna Aulata'ala. Iaku kupogau mboo sii mamudhaakana atiumba o kaea i nuncana karomiu.

15:32 15:32 Yes. 22:13. ‡ **15:32 15:32** *manga binata masega i Efesus:* I lipu Roma amembali saangu giu mobiasa to mia madhaki to apoewangi tee manga binata masega, tee o giu incia sii amembali saangu pogau ibarati minaaka i Paul ande incia apadhamo apoewangi tee manga mia madhaki mokofe'elina mboomo binata masega i kota Efesus. § **15:33 15:33**

Posabhangkaa inda momalape apekadhaki kananea momalape: Kabhanti incia sii aminaaka i saangu kaburi modhaangiana i zamani i piamo itu iburina samia pande pekabanti minaaka i Yunani mokosaroakana Menander.

*Badana Maanusia Mobhaau Sapadhana
Atopadhadhi Pendua
15:35-58*

³⁵ Aipomo dhaangia o mia moabhana, "Tuaapa o carana mia mate atopadhadhi pendua? Tee tuaapa o bhanguna badana naile itu wakutuuna atopadhadhi pendua?

³⁶ E mia mokabhongo-bhongo, ande ingkoo upombula wine i nuncana tana, wine incia sumai inda bheatuwu ande o wine sumai indapo amate porikana.

³⁷ Tee o wine ipombulamu tabeana ompolena, siitumo mboomo ompolena gandum atawa ompole mosagaanana, mencuana sapalea penembula momaoge ipombulamu.

³⁸ Maka naile itu, Aulata'ala bheadhawuaka to ompole sumai saangu modelena penembula mboomo kapeeluana, tee Incia adhawuaka saasaangu ompolena wine sumai mboomo modelena sumbesumbere.

³⁹ Roonamo bhari-bharia mokoinyawana inda apokana o bhanguna badana. Bhanguna badana maanusia aposala tee bhanguna binata, tee o bhanguna manga manu-manu uka aposala tee bhanguna manga ikane.

⁴⁰ Dhaangia o giu modhaangiana i laiana tee dhaangia uka o giu modhaangiana i dunia, maka o kamuliangina o giu modhaangiana i laiana aposala tee kamuliangina o giu modhaangiana i dunia.

⁴¹ Kamuliangina matanaeo aposala tee kamuliangina bula, tee o kamuliangina bula aposala tee kamuliangina manga kalipopo, tee o kamu-

liangina saangu kalipopo aposala tee kamuliangina kalipopo mosagaanana.

⁴² Mboo sumai uka o pokaiana tee manga mia mate motopadhadhina pendua. Bada motokoburu sumai satotuuna o bada momembalina momabhongko, maka o bada ipadhadhi pendua siitumo bada inda momembalina momadhaki.

⁴³ Wakutuuna o bada sumai atokoburu, bada sumai amadhaki tee amatemo, maka i wakutuuna atopadhadhi pendua, incia amembali bada momulia tee momatangka.

⁴⁴ Wakutuuna atokoburu, bada sumai o bada mominaakana i dunia, maka wakutuuna adhadhi pendua o bada sumai aminaaka i sorogaa.

Ande dhaangia o bada mominaakana i dunia, sumaimo dhaangia uka o bada mominaakana i sorogaa.

⁴⁵ Sumaimo atoburi uka i nuncana Kitabi Momang kilo, "Adamu maanusia mobhaa-bhaana sumai, amembali mahaluku modhadhi." Maka o Adamu maanusia kapadhaa sumai satotuuna o Al Masi momembalina Rohi modhawuna dhadhi.

⁴⁶ Tee mobhaa-bhaana mounba satotuuna o bada mominaakana i dunia, siimpomo mounbana minaaka i rohi.

⁴⁷ Maanusia mobhaa-bhaana o asalana minaaka i ngawuna tana, maka o maanusia kapadhaa aminaaka i sorogaa.

⁴⁸ Manga mia i dunia sii satotuuna mboomo Adamu, ipadhaangia minaaka i ngawuna tana, maka manga mia momembalina miana sorogaa apokana tee Incia mominaakana i sorogaa.

⁴⁹ Mboomo uka ingkita sii-sii tapokana mboomo Adamu motopadhaangiana minaaka i ngawuna tana, jadi naile itu ingkita uka bhetamembali mboomo Incia moumbana minaaka i sorogaa sumai.

⁵⁰ E manga witinaiku, siimo bheipogauakaku tee ingkomiu, ande o dagi tee raa inda amembali apotibhaaka tampa i nuncana Pamarintana Aulata'ala, tee o bada momembalina momate inda amembali abakaa.

⁵¹ Udhania, iaku kupaumbaakakomiu saangu rahasia, ande bhari-bharikita inda bhetamate, maka o badata bheabhalii.

⁵² Giu incia sumai bhetatarimaia sakijamata, wakutuuna suarana sangkakala kapadhaa atopakooni. Roonamo wakutuuna atorango onina sangkakala sumai, manga mia momate bheatopadhadhi pendua tee bada mobakaa, tee bhari-bharikita bhetatarima bada mobhaau.

⁵³ Roonamo badata momembalina mobinasa atobholosi tee bada mobakaa, tee o badata momembalina momate sii tabeana atobholosi tee bada inda momembalina momate.

⁵⁴ Ande o badata momembalina mobinasa padhamo atobholosi tee bada mobakaa, tee o badata momembalina momate padhamo atobholosi tee bada inda momembalina momate, i wakutuu incia sumai siimpomo amondo opea motoburina i nuncana Kitabi Momangkilo, "Kuasana mate atotalomo, tee ingkita takanamo!"

⁵⁵ "E mate, ingkoo indamo tee kuasamu to man-gapekamate!

E mate, ingkoo indamo tee kakaamu!"

⁵⁶ Kuasana mate to mangapanarakaana satotuna aminaaka i dosa, tee o dosa amembali apotibhaaka kuasana alaloi Hukumuna Taurati.

⁵⁷ Maka tasukuru i Aulata'ala, Incia manga-pamembalina takana alaloi Isa Al Masi Oputa Momalanga.

⁵⁸ E manga witinai imaasiakaku, rampaakanamo sumai ingkomiu tabeana usadhaadhaa umatangka tee umakate, tee utorotorosu ukarajaa tee mpuu-mpuuna incamiu to Kawasana Opu roonamo ingkomiu umataua bhari-bharia ikarajaamiu to Kawasana Opu inda bheasia-sia.

16

Kahamba minaaka i Jama'a i Korintus to Mia Mosaalihi i Yerusalem

16:1-4

¹ Sii-sii to pokaiana tee doi bheihambaakamiu to manga witinaimiu sa'agama, iaku kupaumbakomiu mamudhaakana upewaua apokana tee opea mopadhana isusuakaku to manga jama'a i Poropinsi Galatia.

² Sa'ahadi-sa'ahadi bhari-bharikomiu tabeana udhikaia sagaa o doi mopadhana ipotibhaakamiu minaaka i peeloamiu, mamudhaakana indamo uka urombusaka doimiu wakutuuna kuumba.

³ Jadi sakawaku iwe siitu, iaku bhekutumpu manga mia iabhimi molaengana to mobhawana

kahambamiu i Yerusalem, tee kupapoosea tee sura iburiku naile itu.

⁴Tee ande o giu incia sumai amalape, sumaimo iaku uka bhekulingka kupoose tee manga incia.

Haejatina Paul

16:5-9

⁵Iaku bhekuumba i tampamiu minaaka i Poropinsi Makedonia* roonamo iaku dhaangiamo tee haejatiku to kumbeliki Makedonia porikana.

⁶Aipomo bhekumboore tee ingkomiu inda amangenge, tee koroo kangengena bulaana kagarimea sabutuna ingkomiu umembali uhambaaku to kupalausaka lingkaaku.

⁷Roonamo iaku kumendeu kuleongikomiu soo sabantarama, maka kuharapu kumboore amangenge tee ingkomiu ande aundaakaaku Kawasana Opu.

⁸Maka iaku dhaangiapo bhekumboore i kota Efesus sakawana i eona raraeana Pentakosta,†

⁹roonamo iwe sii dhaangiapo abhari o kalalesa to manga karajaa mokofa'eda, moomini abhari uka o mia mobhaliaku.

Pia Angu Kasamea

16:10-18

16:5 16:5 Tul. 19:21.

* **16:5 16:5** *Poropinsi Makedonia:*

Saangu poropinsi imbooresina manga miana Yunani. Ibu kotana siitumo Tesalonika. Miana Karasiteni i Makedonia arela adhawu sumbangana to mia mosaalihi i Yerusalem. (Kamatea 2Kor. 8:1-4).

16:8 16:8-9 Im. 23:15-21; Kap. 16:9-11; Tul. 19:8-10. † **16:8 16:8** *eona raraeana Pentakosta:* Eona raraeana miana Yahudi motoraraeakana i lima pulu eo sapadhana Paska.

¹⁰ Ande o Timotius aumba i tampamiu, up-epagomea pekalape mamudhaakana incia inda anamisi kaeka wakutuuna amboore tee ingkomiu, roonamo incia akarajaa to Kawasana Opu mboomo iaku.

¹¹ Jadi bholi dhaangia o mia mopanda'entea, maka uhambea mamudhaakana asalaamati wakutuuna apalausaka lingkaana, tee mamudhaakana incia uka amembali aumba to apokawaakaaku, roonamo iaku kuantagi umbaana Timotius tee manga witinai mosagaanana.

¹² Sainamo to witinaita mokosaroakana Apolos,[‡] dhaangiamo pia mpearo kuemania mamudhaakana incia apobhawa tee manga witinai mosagaanana to aleongikomiu. Maka incia amendeupo aumba sii-sii, tee incia dhaangiapo bheapeelo kalalesa momalape to aleongikomiu.

¹³ Ingkomiu tabeana upengkaanaka tee amatangka o iimanimiu i nuncana udhadhi umembali mia moparacaeana Isa Al Masi. Pem-ingkuimiu tabeana abarani tee usadhaadhaa umatangka.

¹⁴ Bhari-bharia ipewaumi, tabeana upewaua tee kaasi.

¹⁵ E manga witinaiku, ingkomiu umataua o kadhaangiana Stefanus tee manga mia momboorena i nuncana bhanuana, siitumo

16:10 16:10 1Kor. 4:17. [‡] **16:12 16:12** *Apolos*: Mia mominaakana i Aleksandria momakidhana mpuu i nuncana manga urusana Kitabi Momangkilo. Incia adharia Akwila tee Priskila (Kamata Tul. 18:24-28). Incia dhaangia tee moosea i nuncana jama'a i Korintus (Kamata 1Kor. 1:12). **16:15 16:15** 1Kor. 1:16.

manga mia mobhaa-bhaana motobana i Poropinsi Akhaya,[§] tee uka manga incia padhamo aala kambotu to alaianiaka uumatina Aulata'ala mosaalihi. Rampaakanamo sumai kuemani mpuu tee ingkomiu,

¹⁶ mamudhaakana uta'ati manga mia mboo sumai, tee uka uose bhari-bharia mia mokarajaana tee kanguleana bukuna mboomo mia molanianina Isa Al Masi Oputa Momalanga.

¹⁷ Iaku kukaunde-unde tee umbaana Stefanas, Fortunatus tee Akhaius, roonamo manga incia mobholosikomiu.

¹⁸ Manga incia apatanangi ngangarandaku tee ngangarandamiu. Rampaakanamo sumai ingkomiu tabeana uharagaangia manga mia mboo sumai.

Manga Jama'a i Poropinsi Asia Alamboko Salamuna to Jama'a i Korintus

16:19-24

¹⁹ Manga jama'a i Poropinsi Asia alamboko

[§] **16:15 16:15** *Poropinsi Akhaya:* I nuncana Poropinsi Akhaya dhaangia o ibu kota mokosaroakana Korintus, siitumo tampana jama'a motarimana sura incia sii minaaka i Paul. Kota incia sii alabhi atohoromati minaaka i manga kota mosagaanana modhaangiana i Akhaya. Rampaakanamo sumai i nuncana Kitabi Momangkilo sadia apake saro Poropinsi Akhaya to pokaiana tee Korintus.

salamuna to ingkomiu. Akila tee Priskila* tee jama'a modhaangiana i bhanuana manga incia, alamboko uka salamuna mobukeakana kaasi i nuncana saroni Kawasana Opu to ingkomiu.

²⁰ Bhari-bharia witinai sa'agama uka iwe sii alamboko salamuna to ingkomiu. Tee sapadhana ubaca sura incia sii, ingkomiu tabeana uposalasalamumo podho-podho ingkomiu tee abukeaka kaasi mboomo umatina mosaalihi.

²¹ Iaku o Paul, kupakawaaka salamu iburiku tee limaku karoku.

²² Ande dhaangia o mia inda momaasiakana Oputa Momalanga, taroakamo incia amembalika mia mototunda! E Kawasana Opu, umbamo!†

²³ Rahumatina Isa Al Masi Oputa Momalanga apoose tee bhari-bharikomiu.

²⁴ Kaasiku apoose tee ingkomiu bhari-bharikomiu i nuncana saroni Isa Al Masi. Amin.

* **16:19 16:19** *Akila tee Priskila:* Umane tee bhawinena sii apokawa tee Paul i kota Korintus i tampana mbooresana manga incia i piamo itu. Manga incia ahamba Paul i nuncana alaiani Kawasana Opu tee uka o sabhangkana akarajaa tenda i kota Korintus (Kamata Tul. 18:2-5). Maka wakutuuna o sura incia sii aburia Paul, manga incia ambooremo i kota Efesus tee adhaangiamo o jama'ana moporomusakana i bhanuana manga incia (Kamata Rom. 16:3-5). † **16:22 16:22** *E Kawasana Opu, umbamo!:* I nuncana pogau Aram, "Maranata!"

Kitabi Momangkilona Wolio **Wolio: Kitabi Momangkilona Wolio (New Testament+)**

copyright © 2024 Wycliffe Bible Translators, Inc.

Language: (Wolio)

Contributor: Wycliffe USA

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-07-10

PDF generated using Haiola and XeLaTeX on 26 Jul 2025 from source files dated 10 Jul 2025

7df9af1f-1c49-59d2-a164-bde0a20127b3